

Xujun xi kits'ínkjihí nda postru Pablo xuta ninku Roma

B'i ts'ín kikjaniñaha Pablo xuta ninku xi tjín nanki Roma

¹ An Pablo, an nda musu síhin Jesucristo. Ntíaná kits'ín mana nku nda postruhú tū xi k'uenijmíhina éh nda tsuhú, ² éh nda tsu xi kitsú nga tsjá nk'ie nga kits'ínkinchja já profetaha xi nkú ts'ín tjt'a xujun éhen Ntíaná, kui xi tsje.

³ Éh nda tsuú tínchjanijmíyaha Ntíhi, kui xi Nda Ntíaná Jesucristo. Nk'ie nga yjoninte kik'a, ntjehe nda rej David nibaha ra. ⁴ Kó nk'ie nga j'áiyaha ngabayoo, Espiritu Santo y'éjña chji nga kui xi Ntíhi Ntíaná xi tjíhin nga'yún. ⁵ Kitsjana kjuanda kó kits'ín mana nku nda postru ngajoho tū xi tū má k'uenijmíhi ra xuta nga tjíhin nga s'ejihín kó kuint'é'éhen. ⁶ Jun tintsubajiun xuta xi kis'enijmíhi, kui nga xutaha Jesucristo kamahanu.

⁷ Ngayjoo xuta ninku xi tintsuboo nanki Roma títs'ínkjínuu kui xujuin. Tjoho Ntíaná jun kó j'ájinnuu nga kikjats'enuu.

Kas'enuu kjuanda kó kjuajyu xi tsjáná Ntia Na'miná kó Nda Ntíaná Jesucristo.

B'i ts'ín kitsúya Pablo nga mjehe ngjuaisehe xuta ninku Roma

⁸ Kui ni xu'bj xi tjun xínnuu. Tū ngat'aha nga Nda Ntíaná Jesucristo ts'ená, tsjaha máb'achjíhi Ntíaná ngat'aha nga ja kichjubó éhen kó nga ngúsuhun

asunntee tíchubanijmíyaha xi nkú ts'ín s'ejinnuu Ntíaná. ⁹ Ngayjee animana títs'inxát'aha Ntíaná nga tíb'enijmíá én nda tsuhu Ntíhi, kō kui xi be nga tehente ts'inkjónuu nk'ie nga nchjaka.

¹⁰ Bankihi Ntíaná tsa kui xi mjehe katsjáníyána nga kama kfínsenuu. ¹¹ At'aha mje nkjúnna skuenuu tū xi kúásinkohonuu nga sakúnuu ni xi tsjáná Espiritu Santo, tū xi ndjá kuinchahanu. ¹² Mjena nga xi nkú ts'ín nkuhú s'ejinná k'uai nga'yúnkohō raá xinkjá.

¹³ Jun já nts'e, mjena nga choo nga nkjin niyá kama mjena nga kfínsenuu tunga santahá ni nd'ai tjin ni xi tíb'échjana. Mjena ta ts'ian xá xi kitsjana Jesucristo ajinnuu xi nkú nga ta títs'ian ajihin xuta naxinantá xingisoō. ¹⁴ Tjihin nga ts'ian ajihin tū mí xutahá ni xá xi kitsjana, xuta xi nchja én griego kō xi nchja kj'ai én, xi nkjink'uhun kō xi najmi nkjink'uhun. ¹⁵ Kui nga mangimjehena nga k'uenjímíhinuu kō ta jun xi tintsuboo Romá én nda tsuhu Jesucristo.

B'i ts'ín kitsúya Pablo nga tjihin nga'yún én nda tsuhu Jesucristo

¹⁶ Najmi ma subana nga én nda tsuhu Jesucristo b'enijmíá, at'aha kui xi nga'yúhun Ntíaná xi ts'ínk'ankikoho ngayjee xi s'ejihin, xi ntje judio tjeheñ ra kō xi najmi ntje judio tjeheñ ra. ¹⁷ Éñ nda tsuhu Ntíaná bakúchji xi nkú ts'ín Ntíaná tsjáha xuta nga naxu ma nginkun tū ngat'aha nga s'ejihin. B'a ma at'aha s'ejihin, xi nkú ts'ín tjit'a éheñ Ntíaná nga b'i títsu: “Xi ja naxu nginkun Ntíaná tū ngat'aha nga s'ejihin k'úéñña tík'un.”

B'i ts'ín tsakúya Pablo nk'ie nga ngayjee xuta tjihin jé

¹⁸ Ntíaná xi tǐña nk'a ján b'éjña chji kjuakjahan nga ts'ín nibánehe ngayjee xuta xi najmi benkjúhún kǒ incha ts'ín ni xi najmi naxu nginkun. Kui xuto xi b'échja nga cha ni xi naxu tǐn. ¹⁹ At'aha ni xi yaha Ntíaná, kui ta incha be. Ntíaná ta y'éjña chjihí. ²⁰ Najmi tǐn xi nkú ts'ín b'a incha kuitsuhu nga najmi be. At'aha xi nkúhu nga kamanda asuntee tísakúchji nga'yúhún Ntíaná xi najmi mahá ndyja kǒ nga nkuhú kui xi Ntíaná. Kjuaxi kjáihin nga najmi ma chji Ntíaná, tunga kamankjihínná tsa chaseéhe ni xi kin'enda.

²¹ Tunga ta ndahá ni tsa incha kíkíe jóo ni xi ts'e Ntíaná, najmi incha kits'ínkie yjoho nga Ntíaná xi tjihin kjuachánka kǒ ta ndaha najmi incha kitsjáha máb'achjihí. Tu sa ní ni xi najmi chumi ni chjihí ra incha kits'ínkjink'un kǒ incha kama jyihin. ²² Já nkjink'un chubá incha kits'ín mahá yjoho, tunga já síhí incha kama. ²³ Incha kits'ín t'axín kjuachánkaha Ntíaná, kui xi najmi mahá 'me. Kits'ín tsjoho sénnístjihín xuta xi mahá 'me kǒ sénnístjihín nísee, chu kǒ ye.

²⁴ Kui nga Ntíaná kits'ín ndaíhi ra xuto nga ni xi najmi ndoo incha ts'íihin, ni xi nchjaha animaha. Ta kui ta maha najmi incha kíkíenkjún yjonintehe nga ch'on kits'ínko. ²⁵ Incha kits'ín t'axín éhen Ntíaná xi naxu tǐn. Tu én tsank'óhó incha tsakj'á. Incha kíkíenkjún kǒ incha kits'ín tsjoho ni xi kin'enda antehé ni nga xi kits'ínnda niu ts'ín tsjoho, xi tjihin nga n'etsjoho tu nkjéhé ni. B'a tǐn.

²⁶ Kui nga Ntíaná kits'ín ndaíhi ra xuto nga ni

xi suba maná incha ts'ín. Jminchjín jóo incha y'éntu xi nkú ts'ín tjeheñ ra nga incha ts'ínko x'ihín. ²⁷ Já x'in ya ta incha y'éntu xi nkú ts'ín tjeheñ ra nga incha ts'ínko jmichjún. Ta kuihi xinkjín x'in incha kits'ín mje. Tjihín kjuasuba ni xi incha kits'ín. Ta kuihi jáx'in incha kikjantuko xinkjín. Tunga ta incha kits'ínkjáihín ra chjí xi tjeheñ ra kjuangasten xi incha kits'ín.

²⁸ At'ahá najmi incha kits'ínsihín Ntíaná, kui nga Ntíaná kits'ín ndáihí ra nga kuatsúhun kjuankjink'uhún, tu xi incha ts'ihin ni xi najmi ma n'e. ²⁹ Kui nga kitsejihín ra ngayje tíkjá ni ch'onk'un. Najmi naxú incha ts'ín, fantuko jminchjín xi najmi kjee bixan, incha fásihín ni xi tjihín xinkjín ko ch'on incha ts'ín. Kitsejihín animahá kjuaxintak'un, incha ts'ínk'ien xinkjín, ko ta kitsejihín kjuachán, kjuamaña ko kjuach'onk'un. ³⁰ Nchjane xinkjín, én tsank'á ts'inne xinkjín, ts'ín unkie Ntíaná, najmi ch'a benkjún, ma ngak'un, nk'a b'asje yjoho, kjuankjintak'uhún b'asjejin nkjin tíkjá ni xi ch'onk'un, najmi nt'é'éheñ xi cháha, ³¹ si, najmi ts'íntjusun én xi nchja, najmi ch'a xi ts'íntjo, najmi ma n'e jnenta ko najmi ma nimahá xinkjín.

³² Be xuta xu'bo nga xi b'a ts'íun ngabaya tjeheñ ra, at'ahá b'a ts'ín y'éjña Ntíaná. Tunga tu nku b'ahá tjincha ts'ín ko santaha tsjo incha maha nga kj'ái xi b'a ta ts'ín.

2

B'i ts'ín tsakúya Pablo nk'ie nga Ntíaná ts'íinkokjua ngayjee xuta

¹ Ji xi chaseih̄i yá xi nda kō yá xi najmi nda kō t̄n'ek'anji jé x̄ut̄a xi kj'aí, najmi t̄j̄n nkú ts'ín n'esjenkihini yjoh̄i. Nk'ie nga chaseih̄i yá xi nda kō yá xi najmi nda, t̄a ji t̄a maha n'ek'anji jé yjoh̄i, at'ah̄a ji b'a t̄a n'ei. ² Yaá nga kixi ts'ínk̄okjua Nt̄ianá x̄ut̄a xi b'a ts'ún.

³ Ji nda, ji xi chaseih̄i yá xi najmi nda t̄íts'ín kō nk'ie nga b'a t̄a n'ei, ¿a b'a bixín nga kuitjunkihi yjoh̄i nga ts'ínk̄okjua Nt̄ianá? ⁴ ¿Á t̄ín'e t'axih̄in r̄i yjoh̄i kjuanda chánkaha Nt̄ianá kō nk'ie nga t̄u x̄i ts'ín'yún tak'uhunná kō nk'ie nga t̄u x̄i ndahá ts'ín? ¿A najmi mankjih̄in r̄i nk'ie nga kui kjuandaha Nt̄ianá t̄ítsj̄aniyáhi nga k'úínchj'ah̄a r̄i animah̄i?

⁵ Tunga t̄u ngat'ah̄a nga ndjá t̄j̄iyahi kō nk'ie nga najmi t̄í'michj'aihi animah̄i, t̄u sahá t̄ín'etsenéi yjoh̄i kju'a'un xi nibanehe asuntee n̄ist̄j̄in nk'ie nga ts'ín nibá Nt̄ianá kjuakjahan kō ts'ín sisin kju'a. ⁶ Nk'ie b'a kamoo, Nt̄ianá tsjáha chj̄ih̄i nga nkúnkú x̄ut̄a ngat'ah̄a xi nkú t̄j̄in ni xi kits'ín.

⁷ X̄ut̄a xi t̄u nku t̄íncha t̄íts'íh̄in ni xi nda, xi b'a ts'ín t̄íbangisjáhi nga sakúhu kjuachánka xi tsjá Nt̄ianá kō nga nda cha kō nga k'úéntu t̄ík'un sín, kui x̄utaha xi Nt̄ianá ts'ínk'íéntu t̄ík'un síh̄in. ⁸ Tunga x̄ut̄a xi sin kju'a kō najmi nt'é'éhen ni xi naxu t̄j̄in, xi t̄u sahá nt'é'éhen ni xi najmi ndoo, kui xi incha ts'ínkj̄áih̄in kju'a'un xi ts'ín nibanehe Nt̄ianá kō kjuakjahan.

⁹ Kjuanima kō kjuaba sakúhu ngayjee x̄ut̄a xi ts'ín ni xi ch'onk'un, b'ah̄a r̄a x̄ut̄a xi ntje judio t̄jeh̄en r̄a kō xi najmi ntje judio t̄jeh̄en r̄a. ¹⁰ Tunga ngayjee x̄ut̄a xi incha ts'ín ni xi ndoo, kui xi sakúhu kjuachánka xi tsjá Nt̄ianá, nda cha kō s'ehe

kjuajyu, b'aha ra xi ntje judio tjeheh ra ko xi najmi ntje judio tjeheh ra. ¹¹ At'aha namji ngabi ts'in Ntjaná.

¹² Ngayjee xi incha kits'in ngatitsun nga najmi be kjuatexuma xi kin'ekj'asehen Moise, tu nkú ndyjahá ta ndaha tsa najmi kits'ínkokjuaha kjuatexumoo. Ko ngayjee xi incha kits'in ngatitsun nga ja be kjuatexuma xi kin'ekj'asehen Moise, kui kjuatexumoo ts'ínkokjuaha. ¹³ Najmi xuta xi tu basínñjuhú ra kjuatexumoo xi naxu ma nginkun Ntjaná. Xuta xi ts'intjusun ní kjuatexumoo xi naxu n'e ma.

¹⁴ Xuta xi najmi ntje judio tjeheh ra najmi kik'aihi kjuatexuma xi kin'ekj'asehen Moise tunga ts'ín ni xi títsu kjuatexumoo, at'aha mankjihin ni xi nda ko ni xi najmi nda. B'a ts'in kuenta ts'e suba sakúhu ra nku kjuatexuma, ndaha tsa najmi tíñaha kjuatexuma xi kin'ekj'asehen Moise. ¹⁵ Incha bakúchji xuto nga ajin animaha jtít'a ni xi bakúya kjuatexumoo. Animaha tsuyaha tsa nda ko tsa najmi nda ni xi tíincha ts'in. Ko kjuankjintak'uhun tsuyaha tsa tjeheh jé ko tsa najmi tjeheh ngat'aha ni xi tíincha ts'in. ¹⁶ B'a kama nístjin nk'ie nga Ntjaná k'uexáha Jesucristo nga kuasehe ni xi tjintu'máha xuta. B'a kama xi nkú títsu én nda tsu xi túb'enijmía.

B'i ts'in tsakúya Pablo nk'ie nga ta tjihin jé xuta judio ndaha tsa kui kik'aihi kjuatexumoo

¹⁷ Ji xi b'a túbixín nga ji xi ntje judio tjeheh ri, nga kjuatexuma xi kin'ekj'asehen Moise kich'ai ko tsjo mahi at'aha Ntia nku tutuu s'eihin. ¹⁸ Yai ni xi mjehe Ntjaná nga n'ei. Yai má nihi xi nda at'aha

kjuatéxumoo kisakúyahi. ¹⁹ Behe tak'uin nga mahi baku niyáíhi xuta ka ko nga ji xi nkú joyaha nku nd'í xi ts'ín ndzjehen xuta xi tjíma má jyuun. ²⁰ Ji xi bakuyáíhi xuta xi najmi be ni xi ts'e Ntíaná. Ji xi nda maestrúhu xuta xi najmi mankjihin, at'aha tíjñahi kjuatéxuma xi bakúchji kjuankjintak'uun ko ni xi naxu tjín.

²¹ Ji xi bakuyáí, ¿a najmi bakuyáha ri yjohi? Ji xi b'enjímí nga najmi ma n'e ndyjé, ¿a n'ei ndyjé? ²² Ji xi b'a bixín nga chankjáán kjuabixanná, ¿a b'a n'ei? Ji xi unchai ntia xi ntsja xuta ts'ínnda, ¿a najmi n'ei ndyjé ninkuhu ntia xu'bo? ²³ Ji xi tsjo mahi at'aha yai kjuatéxuma xi kin'ekj'asehen Moise, tunga najmi tíyankjúní Ntíaná nk'ie nga tíbiyunéí kjuatéxumoo. ²⁴ B'í títsu éhen Ntíaná má nga jtít'a: “Ngat'anuu najmi tíyankjún Ntíaná ajihin xi najmi ntje judio tjehen ra.”

²⁵ Chjíhi ra nga kin'ehi circuncision tsa tín'etjusuin kjuatéxumoo. Tunga tsa tíbiyunéí kjuatéxumoo, circuncision xi kin'ehi b'a ma xi nkúhu tsa najmi kin'ehi niu. ²⁶ Kui nga tsa xi najmi kin'ehe ra circuncision kj'uatjoho ni xi jtít'a kjuatéxumoo, ¿a najmi n'echjíhi ra ni xi títs'ín nga chasehe xi nkúhu tsa kin'ehe circuncision? ²⁷ Xi najmi kin'ehe circuncision yjonintehe tunga títs'íntjusuhún kjuatéxumoo, kui xi k'uéjñanehi ni xi kanéhi ji xi tíjñahi kjuatéxumoo ko kin'ehi circuncision tunga tíbiyunéí.

²⁸ Najmi yjonintee tsuya yá xi judio, ko najmi ni xi n'ehe yjonintee xi circuncision xi ndoo. ²⁹ Judio ní xi b'a ts'ín tjíyaha ko circuncision xi nda, kui ní xi ma ajin animaha xuta. Espirituhu Ntíaná b'a

ts'íun, najmi ni xi tjí't'a xujun. Xi b'a ts'ín tjiyaha, Ntíaná nda nchjanehe xuta xu'bo, najmi xuta.

3

B'i ts'ín tsakúya Pablo nk'ie nga tu nkú naxuhú ts'ín Ntíaná

¹ Kui b'a maha, ¿mí ni xi tjin saha xi ntje judio tjeheñ rā nī ma? ¿Kō má xi kui chjeheñ circuncision? ² Chjīhi rā niu, tu xi nkú ts'ín chāsehé rāá. Títjun Ntíaná kits'ínkjas'eheñ xuta judio éheñ. ³ Tjin xi najmi kis'ejihin éheñ Ntíaná, tunga, ¿a kuihi nihi xi ts'ín nga Ntíaná najmi ts'íintjusuhun éheñ? ⁴ ¡Najmi! ¡Ndaha tsa mí yeje! Ndaha tsa tsank'á ngayjee xuta, tunga Ntíaná tu nkú ts'íhín ni xi naxu tjin. Xi nkú ts'ín tjí't'a xujun éheñ Ntíaná nga b'i titsu:

S'ejña chji nga ji xi naxui nk'ie nga chubai, ko n'e nganai nk'ie nga n'ekokjuahi.

⁵ Tsa kjuach'onk'unná b'ejña chji nga Ntíaná xi naxu ts'ín, ¿nkú kuixiáán nī ma? ¿A najmi naxu ts'ín Ntíaná nk'ie nga ts'ín nibájennená kjuakjahan at'aha ch'on k'aán? Nk'ie nga b'a tixian, tinchja xi nkúhu nku nda. ⁶ ¡Ndaha tsa mí yeje najmi b'a tjin! At'aha tsa najmi naxu ts'ín Ntíaná, ¿nkú ts'ín ts'íinkokjuaha xuta?

⁷ Tunga tsa ngat'aha én tsank'á xi tinchja, ko tsa b'a ts'ín tís'ejña chjhi nga b'a tjin ni xi ts'ín Ntíaná ko sakú saha kjuachánka, ¿á b'a tí'minaha nī ma nga ngatitsun tít's'ian? ⁸ Ka ma rā b'i k'úhíin xinkjá kai: “Ch'on n'eé tu xi nda kamaha asunntej.” B'a tjincha tsu xi tjincha nchjayaneni nga kui niu xi tjincha bakuyái. Nda tjin nga s'ejñanehe mí nihi xi kanéhe xi b'a tjincha tsuu.

B'i ts'in tsakúya Pablō nk'ie nga najmi tjín xi bichú ma naxu nginkun Ntíaná tu ngat'aha nga ts'intjusun kuatéxumoo

⁹ ¿Nkú kuixíaán ni ma? ¿A 'yún nda sai jin xi ntje judio tjeheenni nga xuta xi najmi ntje judio tjehe n ra? ¡Najmi! ¡Ndaha tsa mí yjehe! At'aha ja kuayaá nga xi judio ko xi najmi judio nkuhú ngatitsuun tjíntujín. ¹⁰ Xi nkú ts'in tjít'a éhen Ntíaná nga b'i títsu:

Najmi tjín xi naxu nginkun Ntíaná,
ndaha nku najmi tjín.

¹¹ Najmi tjín xi mankjihin,
najmi tjín xi bangisjai nga skue yáha Ntíaná.

¹² Ngayjee kindyjajihin niyóo,
nkuhú nga tsatsuhun animaha.

Najmi tjín xi nda ts'in, ndaha nku najmi tjín.

¹³ Ngabaya y'aha ra ni xi tsu,
tu subahá én tsank'á nchja.

Én xi bitju ts'a b'a joyaha xáhan ye,

¹⁴ kitsehe ts'a én ch'on tsu ko én stinta.

¹⁵ Kítsa b'ema nga ts'ínk'ien anima,

¹⁶ ni xi incha ts'in ts'in x'ahan xuta ko kjuanima
tsjáha.

¹⁷ Najmi incha be má tjín kjuajyu,

¹⁸ najmi incha tjínjin tak'un

nga Ntíaná xi tjíhin nga chankjún.

¹⁹ Yaá nk'ie nga xuta xi tíñanehe kjuatéxuma xi kin'ekjas'ehen Moise, kjuatéxumoo tinchjako ho xuta xu'bo tu xi nk'ie nga kuasehe ra Ntíaná mí nihi xi kits'in xuta najmi ta incha kuinchjaha nga najmi ta kuitjunkihi ra yjoho. ²⁰ At'aha ndaha nku najmi naxu chaha nginkun Ntíaná tu ngat'aha tsa

ts'íntjusun ni xi tjí't'a kjuatéxumoo. At'aha tu sa ní kjuatéxumoo b'éjña chjiná nga tjínná ngatitsun.

B'i ts'ín tsakúya Pablo nk'ie nga tu ngat'aha nga s'ejihin xuta Jesucristo naxu bichú ma nginkun Ntiana

²¹ Tunga nd'ai ja y'éjña chji Ntiana xi nkú ts'ín naxu ma xuta nginkun. Najmi kjuatéxumoo xi maha b'a ts'ín. Santa níhi ma n'eya nij ajihin xujun kjuatéxuma xi kin'ekjas'ehen Moise ko ni xi y'ét'a já profeta. ²² Ngat'aha ní nga s'ejihin xuta Jesucristo, b'a ts'ín naxu maha nginkun Ntiana. Ko b'a maha ngayjee xi s'ejihin, at'aha najmi ngabi ts'ín Ntiana. ²³ Tu ngat'aha nga ngayjee xuta kits'ín ngatitsun, ndaha nku najmi sakúhu kjuachánka xi Ntiana tsjá.

²⁴ Tunga chánkahá kjuandaha Ntiana xi tu títsjáhá nga naxu kama xuta nginkun, at'aha Jesucristo y'échjintjai xuta ko kits'ín ndáihí jéhe. ²⁵ Kui xi Ntiana kits'ín ma nku chje. Tsaténdzjo jníhi tu xi sakúhuná kjuan'endyjat'a nk'ie nga s'ejinná Jesucristo. B'a ts'ín tsakúchjiji Ntiana nga naxu ts'ín. Nístjin nk'ie, tu ngat'aha nga tsenta najmi kits'ínnijéhe ra xuta ngatitsun xi kits'ín. ²⁶ Tunga nístjin nd'ai ja tsakúchji nga naxu ts'ín ko nga tu nku naxuhú títs'ín nk'ie nga títsjáhá xuta nga naxu ma nginkun tu ngat'aha nga s'ejihin Jesucristo.

²⁷ Kui b'a maha, ¿a tjín nkú ts'ín kama nk'a n'esjehená yjoná nginkun Ntiana at'aha ngat'aha kjuatéxuma xi kin'ekjas'ehen Moise naxu kama haná nginkun? Najmi kama. S'ejña t'axín ni xu'bo tu ngat'aha nga s'ejinná Jesucristo. ²⁸ At'aha mankjinná nga ma naxu xuta nginkun Ntiana tu

ngat'aha nga s'ejihin Jesucristo, najmi ngat'aha tsa ts'íntjusun ni xi tjí't'a kjuatéxumoo.

²⁹ ¿A tu nkuhú Ntiaha xuta xi ntje judio tjehe ra Ntíaná? ¿A najmi kohó Ntiaha xuta naxinantá xingisoo? Johon, b'a tjin. Ntíaná ta Ntiaha xuta xi najmi ntje judio tjehe ra. ³⁰ At'aha nkuhú maha Ntíaná xi ts'ín nga naxu ma xuta judio xi kin'ehe ni circuncision at'aha s'ejihin, ko ta tsjá nga naxu ma xuta xingisoo xi najmi kin'ehe ni circuncision tu ngat'aha nga s'ejihin. ³¹ Kui nga, ¿a tín'endyanáá chjihí kjuatéxumoo tu ngat'aha nga s'ejiná? ¡Najmi b'a tjin! Tu sa ní b'a ts'ín tí'baihi raá chjí xi tjihin kjuatéxumoo.

4

B'i ts'ín y'éjña chubayaha Pablo nga kits'ínchjén ntje cháha xuta judio xi 'mi Abraham

¹ Chubanijmíyahaná ntje cháná Abraham. ¿Mí nihi xi kisakúhu? ² Tsa Ntíaná kits'ínkjáihin Abraham nga kui xi naxu tu ngat'aha ni nda xi kits'ín, ka ma ra nk'a k'uasje yjoho. Tunga najmi kamahá nk'a k'uasje yjoho nginkun Ntíaná. ³ ¿Nkú títsu éhen Ntíaná ngat'a ts'e ni xu'bo? B'i títsu: “Kis'ejihin Abraham Ntíaná ko kui niu xi kits'ínchjihí ra Ntíaná nga Abraham xi nku nda xi naxu.”

⁴ Xi nkúhu xuta xi ts'ínxá, kui xi ch'axkihí ni xi ts'ín ko b'a ts'ín s'echjihí ra. Najmi tu 'baihi ni xi ts'ínkjáihin. ⁵ Tunga máha xuta xi najmi ma 'yún k'un ni nda xi kits'ín, nga tu sahá s'ejihin Ntíaná xi tsjáha xuta ngatitsuun nga naxu ma nginkun,

Nt̄ianá be nga xuto s'ejih̄in k̄o kui niu xi b'axkih̄i
Nt̄ianá nga naxu basehe.

⁶ B'̄i kitsú David nga: ¡Á b'a nda t̄j̄ihin ts'e xuta xi
Nt̄ianá naxu basehe, najmi tu ngat'aha ni xi kits'ín
t̄sa kui kjuaha nga naxu n'e ma! ⁷ B'̄i ts'ín y'ét'a:

¡Á b'a nda t̄j̄ihin ts'e xuta
xi kin'endyjat'aha ra jéhe,
k̄o kin'endyjajnuhu ngatitsuh̄un!

⁸ ¡Á b'a nda t̄j̄ihin ts'e nda
xi Nt̄ianá najmi b'axkih̄i ra ngatitsuh̄un!

⁹ ¿A tu nkuhú xuta xi kin'ehe ni circuncision
sakúhu kjuanda xi t̄tsu David, a ra kohó xi najmi
kin'ehe ni circuncision? Ja b'a kuixíaán nga Abra-
ham kis'ejih̄in Nt̄ianá k̄o nga kui niu xi kin'echj̄ih̄i
ra nga naxu kin'e ma. ¹⁰ Tunga, ¿nkjé kin'echj̄ih̄i
ra Abraham nga kui xi nku nda xi naxu? ¿A nk'ie
nga ja kin'ehe ni circuncision, a ra nk'ie nga najmi
kjhé n'ehe ni circuncision? Nk'ie nga najmi kjee
n'ehe ni circuncision b'a kama.

¹¹ Askahan kin'ehe Abraham ni circuncision.
Kui niu xi kama nku chuba xi kis'et'aha, chuba xi
tsuhu ra nga naxu kama at'aha kis'ejih̄in Nt̄ianá
nk'ie nga najmi kjee n'ehe ni circuncision. B'a
ts'ín j'ai maha Abraham na'mih̄i ngayjee xuta xi
s'ejih̄in Nt̄ianá, ndaha t̄sa najmi kin'ehe ni cir-
cuncision. Nt̄ianá b'axkih̄i xuta xu'bo xi nkúhu
xuta xi naxu. ¹² K̄o ta j'ai ma Abraham na'mih̄i
xuta xi kin'ehe ni circuncision, xi najmi tu nkú ni
circuncision kin'ehé ra, k̄o ní ta s'ejih̄in Nt̄ianá xi
nkú ts'ín kis'ejih̄in nt̄je chána Abraham nk'ie nga
najmi kjee n'ehe ni circuncision.

B'i ts'ín tsakúya Pablo nk'ie nga kits'íntjusun Ntíaná ni xi kitsúya tíjuhun Abraham

¹³ Ntíaná kitsúya tíjuhun Abraham nga kui ko ntje xi s'ehe askahan ts'íinkjáihin asuntee nga kama ts'e. Tunga najmi ngat'aha ní tsa kits'íntjusun Abraham kjuatéxuma xi kin'ekjas'ehe Moise, tsa kui kjuaha nga b'a kik'in tíjuhun ra. B'a ní kik'ihin at'aha kis'ejihin Ntíaná ko kui niu xi kich'axkihí ra nga kui xi naxu. ¹⁴ At'aha tsa xi tíincha ts'íntjusun kjuatéxumo, tsa kui xi ts'íinkjáihin ni xi kitsúya tíjun Ntíaná nga tsjá, kui xi tsuhu ra nga najmi chumi ni chjihí ra nga s'ejihin xuta Ntíaná ko najmi ta chumi ni chjí kamaha ra én xi kitsúya tíjun Ntíaná. ¹⁵ Nk'ie nga biyuné kjuatéxuma xi kin'ekjas'ehe Moise, kjuakjahan Ntíaná ts'ín nibánehe xuta. Tunga má najmi tjín kjuatéxumo, najmi tjín xi nkú ts'ín kuiyúnehe ni xi títsu.

¹⁶ Kui b'a maha, at'aha ní nga s'ejihin xuta Ntíaná, kui kjuaha nga sakúhu ra ni xi kichuba tíjun, tu xi ngat'aha kjuandaha Ntíaná sakúhu ra ngayjee ntjehe Abraham ni xi kichuba tíjun. Najmi tu nku xi y'aha ra kjuatéxumo xi sakúhu niu. Ta sakúhu xi s'ejihin Ntíaná xi nkú ts'ín kis'ejihin Abraham Ntíaná. Kui xi na'miná ngatentéé ¹⁷ nginkun Ntíaná xi nkú ts'ín tjít'a, má nga b'a kitsúhu Ntíaná Abraham: “Ji xi kits'in maha na'mihí nkjin xuta naxinantá.” Kis'ejihin Abraham Ntíaná, kui xi ts'ínk'íentu tík'un xuta k'ien ko tu ts'ínkjohó ni xi najmi kjee tjín, as'ai s'e.

¹⁸ Abraham kikuyá ni xi kik'ihin ko kama na'mihí nkjin nkjún xuta naxinantá at'aha kis'ejihin Ntíaná, ndaha tsa najmi tjín xi nkú

ts'ín kuitjusuhun niu. Kama xi nkú nga kik'ihin: “B'i ts'ín nkjin kama ntjehi.” ¹⁹ Tu nkú kis'ejihín ra Abraham, ndaha tsa kamankjihín nga ja tu xí nibajehén ra yjonintehe at'aha ja ma kfehé ra unchan nú ko tsa ngat'aha nga ntí Sara xi chjuúhun maha. ²⁰ Najmi jo jan kamaha tsa najmi ta kis'ejihín ra ni xi kitsúya tíjuhun Ntíaná nga tsjáha. Tu sahá ndjá tsasinjña sa nga kis'ejihín ko kits'ínkie yjoho nga chánka Ntíaná. ²¹ Y'énku k'un nga tjihin nga'yún Ntíaná ko nga kamaha ts'íintjusun ni xi kitsúya tíjuhun. ²² Kis'ejihín Abraham Ntíaná ko Ntíaná kits'ínchjíhi ra niu nga Abraham xi nku nda xi naxu.

²³ Má nga tjt'a nga Ntíaná kits'ínchjíhi ra nga kis'ejihín Abraham, najmi tu nkuhú ngandaha Abraham kis'et'a niu. ²⁴ Nganda níná kis'et'aha niu. Ta n'echjíná ko ñá xi nkúhu xuta xi naxu at'aha s'ejinná Ntíaná xi kits'ínkj'áiyaha ngabayoo Nda Ntíaná Jesu. ²⁵ Kui xi kin'ek'ienntjáihi ngatit-sunná ko kin'ekj'áiya ngáha ra ngabayoo tu xi ta kamahaná xuta xi naxu nginkun Ntíaná.

5

B'i ts'ín tsakúya Pablo nk'ie nga nd'ai tjínkoná kjuajyu Ntíaná

¹ Kui b'a maha, naxu kamaá nginkun Ntíaná at'aha s'ejihinná Ntíaná ko tjínkoná kjuajyu ngat'aha ni xi kits'ín Nda Ntíaná Jesucristo. ² At'aha s'ejinná Ntíaná, kui nga Jesucristo kits'ihin nga tsitjas'enjihinná kjuanda xu'bi. Ndjá tinchajían kjuandoo. Kui nga tsjo mahaná nk'ie nga tichuyáá kjuachánka xi tsjáná Ntíaná.

³ Ko najmi tu nku ni xu'bi xi tsjo maná. Ta tsjo maná kjuá'un xi tíbitjajíáán, at'ahá yaá nga kjuá'uun tsjá nga'yúnná tu xi n'e chúkjuahaná ni xi tímat'aán. ⁴ Ko tsa n'e chúkjuá, kixi bitjukaá ni xi tímaná. Ko tsa kixi bitjukaá ni xi tímaná, ma chuyáá ni nda xi tsjáná Ntíaná. ⁵ Ko najmi sakúná kjuasuba, ndaha tsa najmi kjee tíyaá ni xi tíchuyáá. At'ahá Espiritu Santo xi kik'ainá kits'intsejihin animaná kjuatjoho Ntíaná.

⁶ Nk'ie najmi kama kin'ek'anki subáá yjoná, Cristo k'ienntjáíhi xuta ngatitsuun nistjin xi kitsú Ntíaná. ⁷ 'Ni tjin tsa tjin xi kuayántjai nku xuta xi naxu ts'in, tunga kutsa tjihín xi kama k'un kuayántjai nku xuta xi 'yún nda. ⁸ Tunga Cristohó k'ienntjáíhiná nk'ie nga xuta ngatitsun saá. B'a ts'in tsakúchjiji Ntíaná xi nkú ts'in tjoho ñá.

⁹ Nk'ie nga ja xuta xi naxu kamaá nginkun Ntíaná ngat'ahá jní xi tsaténdzjo Cristo, ¿nkú ts'in najmi n'ek'ankihiná nistjin nga ts'in nibájen kjuakjahan Ntíaná? ¹⁰ At'ahá nk'ie nga kamaá xuta kontrahá Ntíaná, ngat'ahá ngabayahá Ntíhi kinchjako ndaná. ¿Nkú ts'in najmi n'ek'ankiná ngat'ahá kjuatík'uhun Ntíhi, ñá xi ja nchjako ndaná nd'ai? ¹¹ Ko najmi tu suba ni xu'bi tíchuyáá. Ta tsjo maná nga Ntíaná kjuáts'ená, at'ahá Nda Ntíaná Jesucristo kits'in nga tábichúk'un ngáha raá Ntíaná.

B'i ts'in tsakúya Pablo nk'ie nga Adan j'aiko ngabayoo tunga Jesucristo kits'ínk'ientu tik'unná

¹² Ngat'ahá ni xi kits'in nku nda ngatitsuun jas'en asunntej ko ngatitsuun j'aiko ngabayoo. B'a ts'in ngjindjuhu ngabayoo ajihin ngayjee xuta, at'ahá ngayjee xuta kits'in ngatitsun. ¹³ Kintehe

ni nga Nt̄ianá kits'ínkjas'eheñ Moise kjuatéxumoo kis'e ngatitsun asunntei, tunga najmi ch'axkihí ra ngatitsun xi ts'ín xuta nk'ie nga najmi kjeé tjin kjuatéxumoo. ¹⁴Yaha nk'ie nga n̄stjihin Adan santaha n̄stjihin Moise tsatéxuma ngabayoo. Ta k'ien xi najmi kits'ín ngatitsun xi nkúhu xi kits'ín Adan. Adan, kui y'ejña chubayaná xi kj'uaí askahan.

¹⁵ Kjuandaha Nt̄ianá najmi b'a joyaha xi nkúhu ngatitsun xi kits'ín Adan. At'aha ngat'aha ngatitsuhun nku nda nkjin xuta k'ien, tunga ngat'aha kjuandaha nku nda, kui xi Jesucristo, nkjin xuta 'yún kisakúhu kjuandaha Nt̄ianá ko ni xi tu kitsjáhá ra. ¹⁶ Ko ni xi tu kitsjáhá Nt̄ianá najmi b'a joyaha xi nkúhu ni xi y'aha ra ngatitsuhun Adan. Ngat'aha nku ngatitsun xi kits'ín Adan, Nt̄ianá kits'innijéhe ko b'a ts'ín jé y'ejñajihin. Tunga askahán ni nga kis'e nkjún ngatitsun, tu kitsjáhá Nt̄ianá nga naxu kama xuta nginkun. ¹⁷ Ngat'aha ngatitsun xi kits'ín nku nda tsatéxuma ngabayoo, tunga ngat'aha ní nku nda, kui xi Jesucristo, incha k'úentu tík'un ko kuatéxuma xuta xi ts'ínkjáihin kjuanda chánkaha Nt̄ianá ko k'uaihi nga naxu kama nginkun.

¹⁸ Kui b'a maha, xi nkú ts'ín tu ngat'aha nku ngatitsun xi kits'ín nku nda jé y'entujihin ngayjeé xuta, b'a ta ts'ín tu ngat'aha nku ni nda xi kits'ín nku nda naxu bichú ma ngayjeé xuta nginkun Nt̄ianá ko k'úentu tík'un. ¹⁹ Xi nkú kama nga najmi kint'é'én nku nda ko kui nga nkjin xuta tsichu maha xuta ngatitsun, b'a ta kama nga kint'é'én nku nda ko kui nga nkjin xuta naxu kuichú maha nginkun Nt̄ianá.

20 Ko ta j'ai s'ejña kjuatéxuma xi kin'ekjas'ehen Moise tu xi sáha ngatitsuun, tunga nk'ie nga ja kisá ngatitsuun, 'yún kisá sa kjuandaha Ntíaná. 21 At'aha xi nkú ts'ín kis'ehe nga'yún ngatitsuun ko j'aiko kjuabayoo, b'a ta ts'ín tjihin nga'yún kjuandaha Ntíaná, kui xi ts'ín nga naxu mahaná nginkun ko ts'ínk'íentu tik'un sínná ngat'aha ni xi kits'ín Nda Ntíaná Jesucristo.

6

B'i ts'ín tsakúya Pablo nk'ie nga ja tsayahaá ngatitsuun ko nga tintsuba tik'unkaá Cristo

1 Kui b'a maha, ¿nkú kujíhinná? ¿A tu nku n'enáhá ngatitsun tu xi 'yún s'ejña chji saha kjuandaha Ntíaná? 2 ¡Najmi! ¡Ndaha tsa mí yjehe! Ja tsayahaá ngatitsuun. ¿Nkú ts'ín kuintsubajin sahaná ngatitsuun? 3 ¿A najmi yanú ni xu'bi? Ngatenteé xi kisaténtájián Jesucristo nkuhú ja makaá ko nkuhú ja tsichu majihín ngabayaha. 4 Nk'ie nga kisaténtájián Cristo, b'a ts'ín tsayakohoná ko kis'eyanjikaá, tu xi kuintsuba tik'un tsetse ngáhaná xi nkú ts'ín Ntia Na'miná kits'ínkj'áiyaha Cristo ngabayoo nk'ie nga tsakúchji kjuachánkaha.

5 At'aha tsa nkuhú tsichu makaá Cristo nk'ie nga k'ien, b'a ts'ín ta nkuhú kuichú makaá nga kjuaiya ngáhaná xi nkú ts'ín j'áiyá ngáha ra ngabayoo. 6 Yaá nk'ie nga kisut'a kruukaá Cristo. Najmi b'a ta ts'ín tintsubahaná xi nkúhu nk'ie. Ja tsatsun yjonintená xi tíñajihín ngatitsun tu xi najmi ta kuinú'yá'éhen raá ngatitsuun. 7 At'aha xi 'me, najmi ta tjin xi nkú ts'íihín ra ngatitsuun.

⁸ Tsa ja tsayakaá Cristo, ta s'ejinná nga ta kuintsuba tik'unkaá. ⁹ Yaá nga Cristo j'áíya ngaha ra ngabayoo ko najmi ta kuayá saha. Najmi ta tjihin ra nga'yún ngabayoo tsa nkú ts'ín saha. ¹⁰ At'aha nk'ie nga k'ien Cristo, nkuhú niyá k'iehen tu xi kikjexihin ra nga'yún xi tjihin ngatitsuun. Ngat'a ts'e nga tíña tik'un, tíña tik'un xi nkú ts'ín mjehe Ntíaná. ¹¹ Ko máha jun, b'a ta ts'ín n'enkjintak'un nga ja tsayoho ngatitsuun ko tintsuba tik'un xi nkú ts'ín mjehe Ntíaná, nga nkuhú makoo Jesucristo.

¹² Kui b'a maha, najmi tu 'baintehe ruu ngatitsuun tsa kui xi kuatéxumaha yjonintenuu xi maha 'me, tsa kuinú'yá'óhooon nga n'oo ni xi mjehe yjonintenuu. ¹³ Najmi tu ngatitsuun 'boho yjonintenuu, tsa ni xi najmi nda n'oo. Tu sa ní Ntíaná tjohon yjonuu, jun xi ja tsayo ko j'áíya ngahanuu ngabayoo. Tjohon yjonintenuu Ntíaná nk'ie nga n'oo ni xi naxu n'e. ¹⁴ Najmi ta kuatéxumahanuu ngatitsuun, at'aha najmi ta kjuatéxumoo tíñanehenuu. Kjuandaha ní Ntíaná tintsubanuiu nd'ai.

B'i ts'ín tsakúya Pablo nk'ie nga najmi ta batéxumahaná ngatitsuun

¹⁵ Ei ni ma, ¿a n'eé ngatitsun, tsa najmi ta kjuatéxuma xi kin'ekjas'ehen Moise tíñanehená, at'aha kjuandaha Ntíaná tintsubanú? ¡Najmi! ¡Ndaha tsa mí yjehe! ¹⁶ ¿A najmi yanú, tsa tjin xi n'ekjas'ohooon yjonuu nga kuinú'yá'óhooon xi nkúhu xuta musuhu, jun xi bichúmo xuta musuhu xi tinu'yá'óhooon? Tsa xuta musuhu ngatitsuun kamo, kuayó. Tunga tsa kuinú'yá'óhooon Ntíaná, naxu kamo nginkun. ¹⁷ Jun xi kamo xuta

musuhū ngatitsuun n̄istjin nk'ie, tunga nd'ai máb'achj̄ih̄i ra Nt̄ianá nga tu sahá ngayjehe animanūu t̄inu'yá'óh̄oon én xi tsinchiyó, én xi kin'ekjas'ennūu. ¹⁸ Ja kamandoóh̄o ngatitsuun k̄o tsichumo x̄ut̄a musuhū ni xi nax̄u t̄j̄ín.

¹⁹ Tíb'ej̄ñá chubayanūu ni xu'bj̄i nga t̄ínchjakonūu at'ah̄a 'ni mankjinná n̄ij̄. N̄istjin nk'ie, ni xi chunt̄í nginkun Nt̄ianá k̄o kjuach'onk'uun kin'ekjas'oh̄oon yjonintenuu tu xi ch'on kin'ehenu. X̄ut̄a musuhū niu kamo, tunga nd'ai n'ekjas'on yjonintenuu nga kamo x̄ut̄a musuhū ni xi nax̄u t̄j̄ín tu xi x̄ut̄a xi ts'e Nt̄ianá kamahanu.

²⁰ Nk'ie nga kamo x̄ut̄a musuhū ngatitsuun, k̄jin tintsuh̄o ni xi nax̄u t̄j̄ín. ²¹ ¿Mí nihi xi kisakúnūu nga kin'o ni xi kin'o nk'ie, ni xi tu subahá manūu nd'ai? Ngabaya y'ah̄a ra ni xi kin'o. ²² Tunga nd'ai ja kamandoóh̄o ngatitsuun k̄o yjankihūu Nt̄ianá. T̄isakúnūu kjuaje xi tsj̄ánūu Nt̄ianá tu xi kuj̄ints̄uba tik'un síhinu. ²³ At'ah̄a ngabayoo, kui xi chj̄ih̄i ngatitsuun, tunga Nt̄ianá tu tsj̄áhá nga k'úéntu tik'un sín x̄ut̄a xi nkuhú mak̄o Nda Nt̄ianá Jesu-cristo.

7

B'i ts'ín y'éj̄ñá chubaya Pablo nga ja tsayahaá kjuatéxumoo

¹ Jun já nts'e, t̄ínchjakonūu jun xi yo kjuatéxuma xi kin'ekjas'eh̄en Moise. ¿A najmi yanú nk'ie nga t̄j̄intu tik'un sa x̄ut̄a y'ah̄a kjuatéxumoo? ² Xi nkúhu nku tachjuún xi t̄j̄ñah̄a x'in, t̄j̄ít'a kjuatéxumoo nga najmi t̄j̄ihin nga k'uéj̄ñá x'ih̄in. Tunga tsa kuayá x'ih̄in, kama ndaí ngáha ra yjoh̄o kjuatéxumaha

kjuabixoon. ³ Kui nga tsa kj'aí nda k'úéjñako_{ho} nk'ie nga tǵña sa x'ih̄in, tǵbangane kjuabixaha_n. Tunga tsa kuayá x'ih̄in, kama ndaí ngáha ra yjoho ni xi tǵít'a kjuatéxumoo. Najmi tǵbangane kjuabixoon tsa kj'aí nda k'úéjñako ngáha.

⁴ B'a ta kamanuu, já nts'ena. Xi ja k'ien najmi ta y'aha ra kjuatéxumoo, ko jun ja tsayakoo Cristo nk'ie nga k'ien tu xi kj'aí xi kama ts'e ngáhanuu. Xi j'áíya ngáha ra ngabayoo, kui xi ts'enuu nd'ai. B'a ts'ín kama n'ehená ni xi ts'e Ntíaná. ⁵ Nk'ie nga kich'a saá asuntee, ngatitsuun kits'ínxájin yjonintená. Ngatitsuun kits'ínchjén kjuatéxumoo nga kin'e mjeé ni xi najmi nda, ko kin'eé ni xi tjehe ra ngabaya. ⁶ Tunga nd'ai ja najmi ta kjuatéxumoo tǵñanehená, at'aha ja tsayahaá kjuatéxuma xi kik'íét'a'yúnná nǵstjin nk'ie. Kui nga tǵn'ehená ni xi mjehe Ntíaná nd'ai xi nkú ts'ín tǵbakú nǵyá tsetsená Espirituhú Ntíaná, najmi xi nkú ts'ín tsakú nǵyáná xujun xi kis'et'a nǵstjin nk'ie.

B'i ts'ín tsakúya Pablo xá xi tǵh̄in kjuatéxumaha Ntíaná

⁷ Ei ni ma, ¿nkú kuixíaán? ¿A kjuatéxuma xi kin'ekjas'ehe Moise y'a ngatitsun? ¡Najmi! ¡Ndaha tsa mí yjehe! Tunga tsa najmi kis'ejña kjuatéxumoo, najmi kieke ra ni xi 'mih̄i ngatitsun. Najmi be tsa najmi nda tǵín nk'ie nga ni xi tǵh̄in xuta kjuasih̄in tsa najmi b'ǵ tǵtsu kjuatéxumoo: “Najmi tu fasih̄in ni xi tǵh̄in xuta.” ⁸ Tunga ngatitsuuhún kits'ínchjén ni xi tǵít'a kjuatéxumoo ko b'a ts'ín kinchjahana nga jasih̄in nkjin tǵkjá ni xi najmi an ts'an. At'aha tsa najmi tǵín kjuatéxuma, najmi tǵh̄in nga'yún ngatitsuun.

⁹ Xi nkúhu an. Nk'ie nga najmi kjee s'ejñanena kjuatéxuma xi kin'ekjas'eheñ Moise, tsátejña tík'an. Tunga nk'ie nga kamankjinna ni xi tjit'a kjuatéxumoo, kisakú nga'yúhún ngatitsuun, as'ai tsaya. ¹⁰ Kikie nga kjuatéxuma xi tjihin nga ts'ínk'íejña tík'unna, kui xi tū sahá kits'ínkjina ngabayoo. ¹¹ At'aha ngatitsuun kits'ínchjén ni xi tjit'a kjuatéxumoo tū xi ts'anachahana. B'a ts'ín kits'ínk'ienkohona ni xi tjit'a kjuatéxumoo.

¹² Jehé kjuatéxumoo, ko ni xi tjit'a kjuatéxumoo je ko naxū tínchja ko nda. ¹³ Tunga, ¿a ni xi ndoo xi kitsjana ngabaya? ¡Najmi! ¡Ndaha tsa mí yjehe! Ngatitsuun ní kits'ínchjén ni xi ndoo nga kitsjana ngabaya tū xi chaha nga kui xi ngatitsun. Ni xi tjit'a kjuatéxumoo tsakúchji nga tū xí 'yúhún ch'onk'un ngatitsuun.

B'i ts'ín tsakúya Pablo ni xi ts'ihin ngatitsuun

¹⁴ Yaá nga kjuatéxumoo ajihin Espirituhū Ntíaná tsitjuhu, tunga an asuntee y'ahana. Ja ts'atsena ngatitsuun ko an kama nda musuhū. ¹⁵ Najmi mankjinna ni xi ts'ian. At'aha najmi ni xi mjena ts'ian. Tū sa ní ni xi najmi sasinna, kui nihi xi ts'ian. ¹⁶ Tunga tsa ts'ian ni xi najmi mjena ts'ian, ni xi tít'sian tít'sínkiékohona yjona nga nda kjuatéxumoo. ¹⁷ Kui nga najmi ta an xi b'a ts'ihinna nga b'a ts'ian. Ngatitsun xi tijnajin nína xi b'a ts'ín.

¹⁸ Be nga xi nkú ts'ín y'ahana asuntee, ndaha nku ni xi nda najmi tijnajinna. At'aha ndaha tsa mjena ts'ian ni xi nda, tunga najmi chúkjuhána b'a ts'ian. ¹⁹ Najmi ts'ian ni xi nda xi mjena ts'ian, tū sa ní ni ch'onk'un xi najmi mjena ts'ian. ²⁰ Tsa

ts'ian ni xi najmi mjena ts'ian, najmi ta an xi b'a tít's'ihinna. Ngatitsun xi tíñajin nína xi b'a tít's'íun.

²¹ Mankjinna ni xu'bj. Nk'ie nga mjena ts'ian ni xi nda, tu ni ch'onk'un xi tíñajihinna bitjuchji. ²² Tsjo maha animana kjuatéxumaha Ntíaná, ²³ tunga mankjihinna nga kj'ai kjuatéxuma tít's'inxájin yjonintena, kui xi kjuatéxumaha ngatitsuun. Kui xi kjánko kjuatéxuma xi tsjániyáha kjuankjintak'unna. F'akj'ánijéna ko ts'in mana nda nubayáha.

²⁴ ¡Nima rú ts'ihinna! ¿Yá xi kuasinkona tu xi kama ndáhi ra yjoninte xu'bj xi tít's'ána ngabaya? ²⁵ ¡Tsjaha máb'achjhi Ntíaná! Nda Ntíaná Jesucristo kits'in ndáina. Tít's'inchjén kjuankjintak'unna nga tít'e'éhen kjuatéxumaha Ntíaná, tunga xi nkúhu nku nda, kjuatéxumaha ngatitsuun tít'e'éhen.

8

B'i ts'in tsakúya Pablo nk'ie nga Espirituhu Ntíaná ts'ínk'íentu tík'unná

¹ Kui b'a maha, najmi ta chumi nihi ta n'enijéhe ra xuta xi nkúhu mako Cristo Jesu, ² at'aha Espirituhu Ntíaná ts'ínk'íentu tík'unkoná Cristo Jesu ko tsjáná nku kjuatéxuma xi ts'in ndáiná kjuatéxumaha ngatitsuun ko ngabayoo.

³ Ni xi najmi kamaha kits'in kjuatéxuma xi kin'ekjas'ehen Moise at'aha asuntee y'aha ra xuta ko najmi kamaha ts'íintjusun ni xi tjít'a, kui nihi xi kits'in Ntíaná nga kits'in nibá Ntíhi. Ntíu kik'a yjoninte xi nkúhu yjoninte ngatitsuun xuta tu xi y'échjintjaihi ngatitsuun. B'a ts'in

kik'ojennkihi Nt̄ianá ngatitsun xi t̄jñajih̄in x̄ut̄a.
 4 B'a kits'ín Nt̄ianá t̄u xi k̄uit̄jusuhun ajinná ni nda
 xi banki k̄juat̄éxumoo, ñá xi najmi t̄a t̄int̄subahaná
 xi nkú ts'ín mjehe yjonintená. T̄int̄suba nínáá xi
 nkú ts'ín mjehe Espirit̄uh̄u Nt̄ianá.

5 At'aha xi asuntee y'aha r̄a nga t̄j̄ntu, kui xi ni
 xi ts'e asuntee ts'ínkjink'un, t̄unga xi Espirit̄uh̄u
 Nt̄ianá y'aha r̄a nga t̄j̄ntu, kui xi ni xi ts'e Espirit̄u
 ts'ínkjink'un. 6 Xi ni xi ts'e asuntee ts'ínkjink'un,
 kui xi kuayá, t̄unga xi ni xi ts'e Espirit̄uh̄u Nt̄ianá
 ts'ínkjink'un, kui xi k'úéntu t̄ík'un k̄o s'ehe k̄juaj̄yu.
 7 At'aha xi ni xi ts'e asuntee ts'ínkjink'un, kui xi
 unkie Nt̄ianá. Najmi t̄j̄ntunkí k̄juat̄éxumaha Nt̄ianá
 k̄o najmi maha t̄sa b'a incha ts'ín. 8 Xi asuntee
 y'aha r̄a nga t̄j̄ntu, kui xi najmi maha ts'ín ni xi
 tsjoh̄o Nt̄ianá.

9 T̄unga máha jun, ja najmi t̄a asuntee
 y'ahan̄uu nga t̄int̄suboo. Espirit̄uh̄u ní Nt̄ianá
 y'ahan̄uu nga t̄int̄suboo t̄sa k̄juax̄i nga kui xi
 t̄j̄ñajinn̄uu. Xi najmi t̄j̄ñajih̄in Espirit̄uh̄u
 Jesucristo, kui xi najmi Jesucristo ts'ehe.
 10 T̄unga t̄sa Cristo t̄j̄ñajinn̄uu, tsuh̄u r̄a nga
 Espirit̄uh̄u t̄íts'ínk'íéntu t̄ík'un̄nuu k̄o ja n̄ax̄u
 tsichumo nginkun Nt̄ianá, ndaha t̄sa ngatitsuun
 ja kits'ínk'ien yjonintenuu. 11 T̄sa Espirit̄uh̄u
 xi kits'ínk'áiyaha Jesu ngabayoo t̄j̄ñajinn̄uu,
 t̄a kuihi xi kits'ínk'áiyaha Jesu t̄a ts'ínk'íéntu
 t̄ík'un yjonintenuu xi maha 'me. B'a ts'ínkon̄uu
 Espirit̄uh̄u Nt̄ianá xi t̄j̄ñajinn̄uu.

12 Kui b'a maha, já nts'e, ja najmi t̄a t̄j̄ihin t̄sa
 kūint̄subaá xi nkúhu x̄ut̄a xi ts'ín ni xi mjehe yjon-
 intee. 13 At'aha t̄sa kūint̄suboo xi nkúhu x̄ut̄a xi

ts'ín ni xi mjehe yjonintee, kuayó. Tunga tsa Espirituhu Ntíaná n'ek'ienkohonu ni xi mjehe yjonintenuu, kuintsuba tík'un.

¹⁴ Ngayjee xi Espirituhu Ntíaná bakú niyáha, kui xi ntíhi Ntíaná. ¹⁵ At'aha Espiritu xi kin'ekjóhōon najmi kits'ín manuu xuta musuhu kjuabinkjuun. Kits'ín ma nínuu Ntíhi Ntíaná kō ts'ín nga: “Na'mi íchí”, k'úíhín Ntíaná. ¹⁶ Kui Espirituhu Ntíaná nkuhú mako animaná nga tsuya kixi nga ñá xi ntíhi Ntíaná. ¹⁷ Tsa ñá xi ntíhi Ntíaná, ta sakúná ni xi ts'e. Jesucristo n'ekjáinkoóho ni xi ts'e Ntíaná. Tsa nd'ai títbitajáán kjuanima xi j'ajin, ta sakúná kjuachánkaha.

B'i ts'ín tsakúya Pablo nk'ie nga tichuyáhaá nistjin nga Ntíaná ts'ín ma kikjinná ntíhi

¹⁸ B'a mana nga najmi chumi nihi kju'a'un xi tibená nistjin nd'ai tsa ch'achubakohoná kjuachánkaha Ntíaná xi kama chjiná askahan. ¹⁹ Ngayjee ni xi kits'ínnda Ntíaná tijncha kuyá kō 'yún mjehe nga s'ejña chji yá xutaha xi ntíhi Ntíaná. ²⁰ At'aha ni xi kamandoo najmi ta tjihin ra nga'yún xi kis'ehe nga tjuhun. Najmi kui kama mjehe nga b'a kamat'ain. Ntia níná b'a ts'ín y'enda nga b'a kamat'ain. Tunga ta tókuyahá ra ²¹ ni xi kamandoo nistjin nga najmi ta kuatsúhun. Tókuyáha nk'ie nga kama ndáihí ch'á xi y'anji, nistjin nk'ie nga b'a ts'ín kama ndáihí xi nkú tsjo ts'ín kama ndáihí ntíhi Ntíaná.

²² Yaá nga santaha nd'ai un tíbehe ngayjee ni xi kits'ínnda Ntíaná, xi nkúhu nku tachjuún xi tsíhin ntí. ²³ Kō najmi tu nku kui xi un tíbehe. Ta un tibená kō ñá. At'aha ja tíñajinná Espirituhu Ntíaná.

Ja kik'ai títjunná ajihin ngayjee ni xi n'ekjáihín askahan. Nkjún tibehe animaná nga tichuyáhaá nístjin nga ts'ín ma kikjinná Ntíaná ntíhi, nístjin nga n'ek'anke yjonintená.

²⁴ At'aha ja kin'ek'ankiná kō tichuyáhaá ni xi sakúná, tunga tsa ja kisuya ntsáá ni xi tichuyáhaá, najmi ta tichuyá saha raá ni xu'bo. ¿At'aha yá xi kuyáha ni xi ja tijnaha? ²⁵ Tunga tsa tichuyáhaá ni xi najmi kjee yaá, tihin nga chuyáhaá santa nkúhu nga n'ekjáihín.

²⁶ Ta basinkoná Espirituhu Ntíaná, at'aha najmi ndjá t jintuyáná. Najmi yaá ni xi kujincháá, tunga Espirituhu ní Ntíaná bankintjainá. Nk'ie nga nchjantjai un'unná Espiritu nginkun Ntíaná, najmi tjin én xi kuixinyahaná xi nkú tsu. ²⁷ Ntíaná xi be animaha xuta, kui xi be mí xi mjehe ts'ín Espiritu. At'aha xi nkú ts'ín mjehe Ntíaná, b'a ts'ín banki Espiritu nga nchjantjai xuta xi Ntíaná kikjats'e.

B'i ts'ín tsakúya Pablo xi nkú ts'ín tjoná Ntíaná

²⁸ Yaá nga ngayjee ni xi mat'ain xuta xi incha ts'intjo Ntíaná, Ntíaná ts'inchjén niu ngandaha xuta xu'bo. Ntíanáhá j'ajihin xuta xu'bo at'aha b'a ts'ín kama mjehe. ²⁹ At'aha xuta xi kieke títjun Ntíaná, ta y'enda títjun nga b'a ts'ín s'eyaha xi nkúhu Ntíhi, tu xi kui Ntíu kamaha Ntí tjun ajihin já nts'e xi nkjin maha. ³⁰ Kō xi y'enda títjun Ntíaná, ta j'ájin. Kō xi j'ájin, ta kits'ín nga tsichu ma naxu nginkun. Kō xi kits'ín nga tsichu ma naxu nginkun, ta kitsjáha kjuachánka.

³¹ Kui b'a maha, ¿nkú kuixín sahaná? Tsa Ntíaná makoná, ¿yá xi nguai kontraná? ³² Kui xi ja y'éjña

nga tu nkú tsjáhá Ntíhi. Kits'ínkjas'en Ntíhi nga kin'ek'ien ngandaná. Kui nga tsa kitsjáná Ntíhi, ¿nkú ts'ín najmi ta tsjáhaná ngayjee ni xi tjín?

³³ ¿Yá xi kamaha ts'íink'anji jé xuta xi Ntíaná j'ájin? Ntíaná kits'ín nga naxu xuta xi ts'e. ³⁴ ¿Yá xi b'a kuítsu nga ngatitsun y'a? Cristo Jesu k'ien ko j'áiya ngáha ra ngabayoo ko tijnat'aha Ntíaná nd'ai nga títbankintjainá. ³⁵ Tjoho ná Cristo. ¿Yá xi kamaha kjé'aná kjuatjoho? ¿A kjuanima? ¿A kjuaboo? ¿A kjua'unchoo? ¿A kjintío? ¿A tu ngat'aha nga x'aán? ¿A ni ch'onk'un xi mat'aán? ¿A ra ngahá n'ek'ienná? ³⁶ B'a ma xi nkú ts'ín tjit'a éhen Ntíaná:

Ngat'a ts'i tehente tintsúbajjin ngabayoo.

Xi nkúhu chutsanká xi n'ek'ien, b'a ts'ín baseni jóo.

³⁷ Tunga ajihin ngatentee ni xu'bi xi kits'íntjoná ta ts'ín nga tu sahá 'yún n'e ngana saá. ³⁸ At'aha behe k'an nga najmi tjín xi kamaha kjé'aná kjuatjoho Ntíaná, ndaha tsa kuayáa ko ndaha tsa kuínsuba tik'aán, ta ndaha ntítsjee ko xi batéxuma ko xi tjihin nga'yún, ta ndaha ni xi tíma nd'ai ko xi kama askahan, ³⁹ ta ndaha ni xi nk'a ko xi nanka, ta ndaha nku ni xi kits'ínnda Ntíaná. Najmi tjín xi kamaha kjé'aná kjuatjoho Ntíaná, kjuatjo xi tsakúchjiná nga kitsjáná Nda Ntíaná Cristo Jesu.

9

B'i ts'ín tsakúya Pablo xi nkú ts'ín Ntíaná j'ájin xuta xi ntje judio tjehen ra

¹ Cristo be nga kjuaxi ni xi tíxian. Najmi tít'anachá. Ko Espiritu Santo b'a títuna nga b'a tjín ni xi tít'ínkjihin k'an. ² Tjín babana ko ixí tíneyahá

tíma an_ima_{na}. ³ Tsa kama kai, mjena tsa santaha an kama nku xi najmi nda nginkun Nt_ianá k_o tsa kjin kúatejñaha Jesucristo, tsa tu ahá ni b'a ts'ín kama kúásinka já nts'é, kui xi ntjena. ⁴ Xi ntje Israel tjehe_n ra. Nt_ianá kits'ín ma ntíhi. Y'ejñajihin k_o tsakúchjiji kjuachánkaha. Ni y'éndak_o ntje cháha k_o kitsjáha kjuatéxumaha. Tsakúchjiji xi nkú ts'ín tjihin nga ts'íintsjoh_o k_o kitsúya títjuhun ni xi tsjáha. ⁵ Nkuhú ntje chá xi j'ájin Nt_ianá, y_o nibaha ra xuta Israel k_o ajihin xuto tsitjujin xi kits'ín niba Nt_ianá nk'ie nga kik'a yjoninte xi nkúhu xuta. Kui xi Nt_ia xi batéxumaha ngayjee ni xi tjín. Kan'etsjo tehentehe tu nkjéhe ni. B'a katuma.

⁶ Tunga najmi j'a tiyahá éhen Nt_ianá. At'aha najmi ngatentee xuta xi y'aha ra ntjehe Israel, tsa kui xi xuta Israel kikjin. ⁷ K_o najmi ngatentee xi y'aha ra ntjehe Abraham, tsa kui xi ntí kikjihin Abraham. At'aha Nt_ianá b'a kitsúhu Abraham: “Ntje xi s'ehi Isaac nibaha ra.” ⁸ Kui xi tsuhu ra nga najmi ntí xi kis'ehe Abraham xi nkú ts'ín s'ená ntí, tsa kui xi ntíhi Nt_ianá. Ntí xi kis'e níhi xi nkú ts'ín kitsúya títjun Nt_ianá, kui xi kits'ínchjiji nga kui xi ntjehe Abraham. ⁹ At'aha kui én xu'b_i xi kitsúya títjuhun Nt_ianá Abraham: “Núni xi nkú ma nistjin xu'b_i kuakuchjiji nga'yúnna. Nku ntíx'in s'ejñaha Sara.”

¹⁰ K_o najmi tu nku ni xu'b_i kama. B'a ta kamat'ain Rebeca nk'ie nga y'a ntí'yun. Kui xi kama chjuúhun Isaac xi ta ntje cháha xuta Israel. ¹¹ Nt_ianá kinchjako títjuhun Rebeca nga kinchjanijmíyaha ntíhi nk'ie nga najmi kjee tsin k_o najmi kjee ts'ín ni xi nda k_o a ra ni xi ch'onk'un, tu xi kuitjusuhun ni xi y'enda títjun Nt_ianá nga j'ájin

ntí xi kama mjehe. At'aha Ntíaná f'ájin xuta xi mjehe, najmi f'ájin tu ngat'aha ni nda xi ts'ín xuta. ¹² Kui nga b'a kitsúhu ra Rebeca: “Ntí xi tjun tsíun, musuhu ntí xi tsjénkiu kama.” ¹³ Xi nkú ts'ín tjí't'a éhen Ntíaná nga b'i títu: “Tjo kits'ian Jacob ko kits'in unkie Esau.”

¹⁴ Kui b'a maha, ¿nkú kuixíhinná? ¿A ts'ín Ntíaná ni xi najmi naxu tjin? ¡Najmi! ¡Ndaha tsa mí yjehe! ¹⁵ At'aha b'a kitsúhu Moise: “Kama nimana xi mjena nga kama nimana, ko kuase nimaha xi mjena nga kuase nimaha.” ¹⁶ Kui b'a maha, najmi ngat'aha tsa ni xi mjená ko tsa ni nda xi t'n'eé, tsa kui kjuaha nga nda ts'ínkohoná Ntíaná. Nda ní ts'ínkoná at'aha ma nimaha ñá. ¹⁷ At'aha b'i ts'ín tjí't'a má nga b'a kitsú Ntíaná nga kinchjako nda faraon: “Kitsja xaha tu xi kuakuchjéhina nga'yúnna ko tu xi chahana nga ngúsuhun asuntee.” ¹⁸ Kui b'a maha, Ntíaná ma nimaha ra xi mjehe nga kama nimaha ko ts'ín ndjá animaha xi mjehe nga ts'ín ndjá animaha.

B'i ts'ín tsakúya Pablo xi nkú ts'ín Ntíaná bakúchji kjuakjahan ko kjuatsentaha

¹⁹ Kutsa b'ahá kuixínní: “¿Mí nihi xi ts'ínnijéhená Ntíaná yo ni ma? At'aha, ¿yá xi ma fi kontraha ni xi mjehe Ntíaná?”

²⁰ ¿Yáhá ni ji nda, tsa kuinchíhi kuenta Ntíaná? Nku ndjii najmi ma: “¿Á b'a n'e kin'endahaní?”, tsa kuitsuhu xi kits'índaha. ²¹ ¿A najmi tjihín ra kixi nda xi ts'ínnda ndíu nga ts'ínko nintee xi nkú ts'ín mjehe? Ta kuihi nintee kama ts'ínnidako nku ndjii xi sasíña tsjo ko nku xi n'echjén tehente.

²² Nt̄ianá mjehe nga kuakúchji kjuakjahan ko nga k'uéjña chji nga'yúhun. Tunga títs'in chúkjuaha ko títs'intsentako xuta xi nibajennehe kjuakjahan, kui xi xá n'ekjehe. ²³ B'a títs'in Nt̄ianá tu xi chaha ra xi nkú ts'in chánka kjuachánka xi tjínkoho xuta xi tíma nimaha, xuta xi ja y'énda títjun nga tsjáha kjuachánkaha.

²⁴ Ná xuta xu'bo. Nt̄ianá j'ájinná najmi tu nku ajihin xuta xi ntje judio tjeheh ra, tu sa ní ko ta ajihin xi najmi ntje judio tjeheh ra. ²⁵ B'a kama xi nkú ts'in y'é't'a éhen Nt̄ianá nda profeta Osea nga b'i títsu:

Xuta xi najmi xutana, kui xi ts'in ma xutana.

Ko xi najmi kits'intjá, kui xi ts'intjá.

²⁶ Ko xi má nga b'a kik'ihin xuta:

“Jun xi najmi xutana mahanu”,

b'a k'úin nga kui xi ntíhi Nt̄ianá xi tíjña tík'uun.

²⁷ Ko b'a ta kitsú nda profeta Isaiá nga kinchjanímyaha xuta Israel: “Ndaha tsa b'a ts'in nkjin maha xuta Israel xi nkú joyaha tsumí xi tjíndai ntáchak'uun, tunga tu chubahá xi n'ek'anki.

²⁸ At'aha ja ts'jintjusun xatí Nt̄ianá ni xi kitsú nga kama nga ngúsuhun asuntee.” ²⁹ Xi nkú nga ta kitsú títjun Isaiá nk'ie nga b'i kitsú:

Tsa najmi y'éjña saná ntje Nt̄ianá xi tjíhin nga'yún, ja ra b'a ta kamat'aán tsakai xi nkúhu xuta Sodoma ko tsichu ma raá tsakai xi nkúhu xuta Gomorra.

B'i ts'in tsakúya Pablo yá xi naxu bichú ma nginkun Nt̄ianá

³⁰ Kui b'a maha, ¿nkú kuixíhinná? Xuta xi najmi ntje judio tjeheh ra, xi najmi tsangisjai nga naxu k'úentu nginkun Nt̄ianá, kui xi naxu tsichu

ma nginkun Ntíaná. Kis'ejihin Ntíaná, kui nga naxu tsichu maha. ³¹ Tunga máha xuta xi ntje judio tjeheh ra, incha tsangisjái nga ts'íntjusun kjuatéxuma xi kin'ekjas'eheh Moise, tu xi b'a ts'ín naxu k'úéntuhu nginkun Ntíaná, tunga najmi tsichukjuahá ra.

³² ¿Á b'a kamaha? At'aha najmi tsangisjái nga naxu k'úentu nginkun Ntíaná xi nkúhu xuta xi s'ejihin Ntíaná. Tu sa ní incha kama mjehe nga ts'íntjusun ni xi tjít'a kjuatéxumoó tu xi b'a ts'ín naxu kuichú maha kai. Incha kisaténki ndjio xi saténki xuta. ³³ B'a kama xi nkú ts'ín tjít'a:

An k'uejñá nanki Sion nku ndjio xi saténki xuta,

nku naxi xi ts'íinxuntuhu.

Tunga xi s'ejihin xi ts'in nibá,

kui xi najmi sakúhu kjuasuba.

10

¹ Jun já nts'e, nk'ie nga nchjaka Ntíaná, bankin-tjá xuta Israel, at'aha mjena nga n'ek'anke. ² At'aha kama xinya nga kui xi 'yún tíncha bangisjai ni xi ts'e Ntíaná, tunga najmi incha mankjihin ra xi nkú ts'ín tjihin nga incha ts'ín. ³ Najmi kamankjihin nga Ntíaná tu tsjáhá ra xuta xi s'ejihin nga naxu kama. Tu sa ní kuenta ts'e suba incha tsangisjai xi nkú ts'ín naxu kuichú ma nginkun Ntíaná. Najmi kits'ín nimakjua yjoho tsa ts'ínkjáihin nga Ntíaná tu tsjáhá ra xuta nga naxu kama nginkun. ⁴ At'aha tsichutjusun kjuatéxuma xi kin'ekjas'eheh Moise nk'ie nga j'ai Cristo, tu xi naxu kuichú maha nginkun Ntíaná ngayjee xi s'ejihin.

B'i ts'in tsakúya Pablo nk'ie nga ngayjee xuta xi s'ejihin Ntíaná naxu bichú ma nginkun Ntíaná

⁵ B'i ts'in y'ét'a Moise xi nkú ts'in naxu bichú maha xuta xi ts'intjusun kjuatéxuma xi kin'ekjas'ehen Moise. B'i kitsú: "Xi ts'intjusun ni xi tjít'a kjuatéxumoo, ngat'aha kjuatéxumoo sakúhu ra nga k'uéjña tik'un." ⁶ Tunga b'ihí ts'in y'ét'a ngá xi nkú ts'in naxu bichú maha xuta xi s'ejihin Ntíaná: "Najmi tu b'i ts'in n'enkjíntak'uin: ¿Yá xi ngjuainji ndjiojmi ján?" Tsuhu ra éin tsa n'e nibájen xi ts'ín niba Ntíaná ngajoho. ⁷ Kó b'i ta kitsú ya: "Kó najmi tu b'i ts'in n'enkjíntak'uin: ¿Yá xi ngjuai kinte t'anankiu?" Tsuhu ra éin tsa chjúsintjen xi ts'ín niba Ntíaná ngajoho ajihin xuta k'ien. ⁸ B'i kitsú Moise: "Tjñat'a tiñahi éhen Ntíaná, tsu'bai kó animahí tjñat'a." Kui éin xi tíb'enjímí nd'aj, én xi tsu nga xuta tjihin nga s'ejihin Ntíaná.

⁹ At'aha tsa tsu'bai kuitjuhu nga n'ekiei yjohi nga Jesu xi Nda Ntíaná, kó tsa ngayjehe animahí s'ejihin nga Ntíaná kits'ínkj'áya ngáha ra Jesu ngabayoo, n'ek'ankihi. ¹⁰ At'aha ajin animaha ní xuta nibáha ra nga s'ejihin Ntíaná, tu xi naxu bichú maha. Kó ts'a bitjuhu nga b'a tsu nga Jesu xi Nda Ntíaná, tu xi n'ek'ankihi.

¹¹ B'i ts'in tjít'a éhen Ntíaná: "Xi s'ejihin Ntíaná najmi sakúhu kjuasuba." ¹² At'aha nkuhú chasehe ra xuta xi ntje judio tjehe ra kó xi najmi ntje judio tjehe ra. At'aha nkuhú maha Nda Ntíaha ngayjee xuta kó tsjáha ngayjee xi kuinchjakoho kjuanchiná xi tjihin. ¹³ At'aha b'i ts'in tjít'a: "N'ek'anke ngayjee xi ts'ínkjáihin nga kui xi Nda Ntíaná."

14 Tunga xuta xi najmi kjee s'ejihin, ¿nkú ts'in ts'ínkjáihin ra nga kui xi Nda Ntíaná? ¿Nkú ts'in s'ejihin ra xi najmi kjee nt'é yáha kui? ¿Nkú ts'in kuint'éhe tsa najmi tjín xi k'uénijmíhi? 15 ¿Nkú ts'in k'uénijmíhi xuta tsa najmi s'et'a xáha nga k'uénijmí? At'aha b'i ts'in tjít'a: “Á b'a tsjo tjíhin nga f'aik'úhunná xi b'énijmíná én nda tsu.”

16 Tunga najmi ngayjeehé xuta Israel kits'ínsihin én nda tsuhú Ntíaná. B'i kitsú Isaia: “Ji Ntia, ¿yá xi kis'ejihin én xi y'enijmí?” 17 Kui b'a maha, s'ejinná Ntíaná nk'ie nga nu'yáá éhen, kó nu'yáá éen nk'ie nga s'enijmíná Jesucristo. 18 Tunga b'ahá xian: ¿A najmi kinu'yáhá éen? Johon, kinu'yá. At'aha b'i ts'in tjít'a:

Nga ngúsuyun asuntee kinu'yá ntaha,
santaha má fekuhu asuntee tsichu éhen.

19 Kó b'i ta xin ya: ¿A najmi incha kiekiehé xuta Israel ni xu'bi? Tjun Moise b'i ts'in y'ét'a éhen Ntíaná:

An ts'ian nga jun kama xintak'un
xi tu a xutahá,
kó ts'ian nga n'ekjankoo
xi najmi chumi nihi xi mankjihin.

20 Kó askahan kama k'un Isaia nga b'i ta ts'in y'ét'a éhen Ntíaná:

Xi najmi tsangisjaina, kui xi kisakúhu an,
kó xi najmi kingjásjaiyana, kui xi tsakuchjhi yjona.

21 Ngat'a ts'e xuta Israel b'i ts'in tjít'a: “Nku nistjin ntanta kik'ana nga kingjentéhe ntsa nku naxinantá xi najmi nt'é'én kó si.”

11

B'i ts'ín tsakúya Pablo nk'ie nga ta tjín ajihin xuta xi ntje judio tjeheh ra xi ja ts'an ki

¹ Kui nga b'a xihinna, ¿a kits'ín t'axíhín Ntíaná xutaha? ¡Najmi! ¡Ndaha tsa mí yjehe! At'aha ta nda Israel ná, ntjehe Abraham. Ntje cháná Benjamin y'ahana. ² Najmi y'éjña t'axín Ntíaná xuta xi ts'e xi j'ájin títjun. ¿A najmi yanú xi nkú ts'ín tjít'a xujun éhen Ntíaná má nga nda profeta Elia kinchjako Ntíaná ko tsatéjéne xuta Israel? B'i ts'ín tjít'a: ³ “Ji Ntia, ja kits'ínk'ien xuta xu'bi já profeta xi ts'i ko ja kits'ínkatsún nachan chjehi. Tu nkuhú an tíjña sa. Ta incha mjehe ta ts'ínk'ienna.” ⁴ Tunga b'ahá kitsú Ntíaná: “Ja kits'in ts'an yatu mi já xi najmi tsasinkúnch'int'aha ntia Baal.”

⁵ B'a ta tíma nístjin nd'ai. Tu ngat'aha kjuandaha Ntíaná tjintu sa chuba xuta xi Ntíaná j'ájin. ⁶ Tsa tu ngat'aha kjuandaha Ntíaná kichj'ajihin xutai, tsuhu ra nga najmi kichj'ajin tu ngat'aha ni nda xi incha kits'ín. At'aha tsa tu ngat'aha ni nda xi incha kits'ín xuta kichj'ajihin, kjuandaha Ntíaná najmi ta chjhi ra ma.

⁷ Kui b'a maha, ¿mí nihi xi kama? Najmi kisakúhu ni xi tsangisjái xuta Israel. Xi j'ájin ní Ntíaná, kui ní xi kisakúhu niu. Xingisoo kama ndjá animaha. ⁸ B'a kama xi nkú ts'ín tjít'a: “Ntíaná kitsjáha xuta xu'bo kjuankjintak'un tiya, tunkun xi najmi skuékoho ko tjabaxínñju xi najmi kuint'ékoho santaha nístjin nd'ai.”

⁹ Ko b'i ta kitsú ya David:
Kasaténkiko s'íhi xuta xu'bo,
ta kuihi kats'ínndyjajihin ko kats'ínk'íéchjhi.

10 Incha katuma ka tu xi najmi ta skuehe,
ko musu incha katuma sin.

*B'i ts'in tsakuya Pablo nk'ie nga ta n'ek'anki xuta
xi najmi ntje judio tjehe ra*

11 Kui nga b'a xihinna, za tu niya kis'entuhú
xuta Israel nk'ie nga kiaténki? ¡Najmi! ¡Ndaha tsa
mi yehe! B'i ni kama. Tu ngat'aha nga najmi
kint'é'éhen Ntiana xuta Israel, kui nga j'aihi ra en
xi ts'ink'ankihí xuta xi najmi ntje Israel tjehe ra,
tu xi b'a ts'in kama xintak'uhun xuta Israel. 12 Tsa
tu ngat'aha nga najmi kint'é'éhen Ntiana xuta Is-
rael, tsa kui ngat'oo kisakúhu ra kjuanchinaha
Ntiana xuta xi tin asuntee, ko nk'ie nga kiaténki
Israel kisakúhu kjuanchinaha Ntiana xuta xi najmi
ntje Israel tjehe ra, zinkú sa kama nk'ie nga sakú
ngaha ra xuta Israel ante xi ts'e nginkun Ntiana?

13 Tinchakonuu jun xi najmi ntje Israel
tjehennuu. Ntiana kits'in mana nda postruhu
xuta xi najmi ntje Israel tjehe ra ko xinya
kjuachankaha xana. 14 B'a ts'ian tsa tu ahá ni
ngat'anuu kama xintak'uhun ntjena, tsa tu xi b'a
ts'in n'ek'ankihi k'ua. 15 At'aha kisakúhu kjuajyu
nginkun Ntiana xuta xi tin asuntee nk'ie nga
kin'e t'axin xuta Israel. Kui nga, zinkú sa kama
nk'ie nga n'ekjain ngaha ra? Sakú ngaha ra nga
k'úentu tik'un xuta k'ien.

16 Tsa tsje nginkun Ntiana na'yu xi n'endakoho
ninkuan chje xi 'bai tjuhun Ntiana, tsuhu ra nga
ta tsje ngayjee na'yu ninkuon. Tsa tsje nginkun
Ntiana kjamaha nku ya, tsuhu ra nga ta tsje tjiaha.
17 Xuta Israel, kui xi nkú joyaha tjia xi kitit'aha
nku ya olibo, ko ji xi nkú joyaha tjiaha ya olibo

jñá. Tunga jihí kis'et'ai antehē tja xi kitit'óo kō kisakút'aihi kjuatík'un xi tijnajin kjamaha yá olibo xi ndoo. ¹⁸ Tunga najmi tu nk'ahá n'esjei yjohi, tsa b'a kuixín nga ji xi 'yún nda sai nga tja xi kitit'óo. Tsa mjehi nk'a n'esjei yjohi, tu sahá n'ekj'áitsjein nga kjamaha yóo y'aha ri. Najmi ji xi kich'ai kjamō.

¹⁹ Kutsa b'ahá kuixín: “Tu xi an s'et'ahana antehē yóo, kui nga kitit'áha.” ²⁰ B'a tjin. Tunga kitit'áhá at'aha najmi kis'ejihin Ntjaná, kō ji ndjá tisinjñai nd'ai at'aha s'ejihin. Kui nga najmi tu n'enkjintak'uhunni tsa ji xi 'yún nda sai. Tu sa ní tñkjúin Ntjaná. ²¹ At'aha tsa Ntjaná najmi kits'ínndyjat'aha tja xi ndaha yá olibo, ¿a tu kjehé ji ts'ínndyjat'ahi nga tu kisut'aní yóo?

²² Chasei xi nkú ts'ín nda kō ndjá ts'ínkō Ntjaná xuta. Ndjá kits'ínkō xi kisaténki kō ji nda kits'ínkōhi. Kō nda ts'ínkōhi tsa tu nku kuinchunjinní kjuandaha. Tunga tsa najmi b'a n'ei, kō ta ji kuichát'ahi. ²³ Kō ta xuta Israel, tsa ngjuaikj'áha ra animaha kō s'ejihin Ntjaná, k'uai ngáha ra ante xi ts'e. At'aha tjihin nga'yún Ntjaná nga tsjá ngáha ra ante xi ts'e xuta Israel ajihin yá olibo. ²⁴ At'aha ji xi nkú joyaha tjiaha yá olibo jñá tu kis'et'aní antehē yá olibo xi ndoo. Kui b'a maha, ¿a najmi kamahá k'uai ngáha ra xuta Israel antehē? At'aha kui xi tja xi ndoo.

B'i ts'ín tsakúya Pablo nk'ie nga kama nimaḥa Ntjaná ngayjē xuta

²⁵ Jun já nts'e, mjena nga choo nku ni xi y'éjña 'ma Ntjaná, tu xi najmi nk'a n'esjehenu yjonuu. K'ua xi tjin ajihin xuta Israel kama ndjá animaha.

B'a kama santa nkúhu nga sakúntehe nginkun Ntíaná ngayjee xuta xi najmi ntje Israel tjeheh ra. Kui xi tjihin nga n'ek'anki. ²⁶ Nk'ie nga ja b'a kama, ta n'ek'anki ngayjee xuta Israel. Xi nkú ts'in tjit'a éhen Ntíaná:

Nanki Sion nibaha xi ts'ínk'anki xutana, kui xi kjéxihin kjuach'onk'uhun ntjehe Jacob.

²⁷ Kui nij xi y'endaka xutana nga ts'ian, nk'ie nga ja kjexían ngatitsuhun.

²⁸ Najmi mjehe xuta Israel én nda tsuhu Ntíaná. Ngandanuu xuta kontraha Ntíaná tsichu ma. Tunga tjohó ra Ntíaná xuta Israel tu ngat'aha nga Ntíaná j'ájin ntje cháha. ²⁹ At'aha najmi kje'á Ntíaná ni xi tsjá ko ta ndaha najmi ts'in t'axin xuta xi j'ájin.

³⁰ Nistjin nk'ie, najmi kinu'yá'óhoon Ntíaná, tunga tibase nimahanuu nd'ai tu ngat'aha nga najmi kint'é'én xuta Israel. ³¹ Ko santaha nistjin nd'ai najmi tint'é'én xuta Israel, tu xi ta chase nimaha ra tu ngat'aha nga jun kichase nimanuu. ³² B'i tjihin ra nij. Ndaha nku xuta xi tjin najmi nt'é'éhen Ntíaná. Ntíaná y'éjñaha xuta nga najmi kint'é'én, tu xi nkuhú nga kama nimaha ra ngayjee.

B'i ts'in kits'intsjohó Pablo Ntíaná

³³ ¡Á b'a nkjún ts'in chánkaha kjuanchinaha Ntíaná! ¡Á b'a nkjún ts'in nanka ts'innkjink'uhun ko á b'a nkjún ts'in tsehe kjuankjintak'uhun! Najmi tjin xi mankjihin ni xi ts'in Ntíaná ko najmi ch'a maha tsuya á b'a ts'ihin.

³⁴ At'aha, ¿yá xi be xi nkú ts'in ts'innkjink'un Ntíaná? ¿Yá xi kitsúyaha ni xi tjihin nga ts'ín?

³⁵ ¿Yá xi kits'ínkienyaha tsa mí nihi,

tu xi Nt̄ianá t̄jihin nga ts'íink'óya ngáha ra?

³⁶ At'aha Nt̄ianá kits'inn̄da ngayjee ni xi t̄jín. Ngat'aha k̄o nga tsjoh̄o t̄jihin niu. ¡N'ek̄ié yjoná nga t̄jihin k̄juachánka Nt̄ianá tu nk̄jéhé ni! B'a katuma.

12

B'i ts'ín tsakúya Pablo xi nkú ts'ín tintsubaá nd'ai nga ja yjankiá Cristo

¹ Kui b'a maha, já nts'e, at'aha t̄ibase n̄imaná Nt̄ianá, kui nga t̄ibankih̄inu nga ngayjehe tak'un n'etsjoh̄oo Nt̄ianá, nga n'ek̄jas'oh̄oon yjonuu xi nkú joyaha nku ch̄je t̄ík'un xi tsje k̄o xi sasih̄in Nt̄ianá. ² Najmi tu b̄intsub̄oo xi nkú ts'ín t̄jintu xuta asuntee. Tu sa ní n'ek'óntjaiyo yjonuu xi nkú ts'ín Nt̄ianá t̄its'ín tsetse k̄juank̄jintak'unnuu, tu xi b'a ts'ín kamank̄jih̄innuu ni xi mjehe Nt̄ianá, ni xi nda, xi sasih̄in k̄o xi ja nda tsichu ma.

³ Nga nkúnkú jun t̄ínchjak̄onu, at'aha Nt̄ianá kitsjána k̄juandaha. Najmi tu nk'a n'esjo yjonuu. Nkú ní ts'ín t̄jíanuu. B'a ts'ín n'esjo yjonuu xi nkú ts'ín kitsjánuu Nt̄ianá nga s'ejinnuu. ⁴ At'aha xi nkú ts'ín nk̄jin t̄íkjá maha ni xi y'aha yjonintená k̄o xi nkú ts'ín k̄j'aí k̄j'aí xá xi kik'ah̄i nga nkúnkú, ⁵ b'a ta joyaha ñá. Nk̄jin mahaná tunga nkuhú yjoninte kamakáa Cristo. Nga nkúnkáá kich'aá xinkjá.

⁶ K̄j'aí k̄j'aí ni xi maná n'eé. Kui k̄juanda xi kitsjána Nt̄ianá nga nkúnkáá. Xi Nt̄ianá kitsjáha éhen tu xi ts'íink̄jas'ehen, kui xi katsúya éhen Nt̄ianá xi nkú ts'ín kik'ah̄i nga s'ejih̄in. ⁷ Xi kik'ah̄i nga kuasink̄o xuta, kui xi katasink̄o xuta. Xi kik'ah̄i nga kuakúya, kui xi katakúya. ⁸ Xi kik'ah̄i nga tsjá nga'yún, kui xi katsjá nga'yún. Xi kik'ah̄i nga

tsjá toon, kui xi ngayjehe animaha katsjá toon. Xi kik' aihí nga tsjén tíjún, kui xi kixi katjiko xáha. Xi kik' aihí nga kuase nimaha xuta, kui xi tsjo kat'ehe nga b'a kats'ín.

B'i ts'ín tsakúya Pablo nk'ie nga kjuatjo tijnajinná

⁹ N'etjó kjuaxi xinkiu. Najmi tu n'esiuhuun ni xi ch'onk'un. Ni xi nda ch'a ntsja ntsjon. ¹⁰ B'i ngján n'etjó xinkiu xi nkú ts'ín tjohó xinkjín xi nts'e maha, at'aha nts'ohó mahanuu xinkiu. 'Yún chanjún so xinkiu. ¹¹ Kixi n'oo ni xi tín'o ko najmi tu n'ets'o. Tu xí tsjohó kat'ehe animanuu nga n'oo ni xi mjehe Nda Ntjaná. ¹² Tsjo kat'enuu nga chúyohó ni xi tsjánuu Ntjaná. N'echúkuo kju'a'un xi tíyo. Najmi tu n'ekj'ajiun nga chubakoo Ntjaná. ¹³ Tjohoon ni xi ndyjat'áha xuta xi yjanki Ntjaná ko nda n'ekjóhóon xi kujchúk'unnuu.

¹⁴ Chubantjo xuta xi tjennki unkienuu. B'a t'ihuun Ntjaná nga nda kats'ínkoho. Najmi tu ni xi najmi nda binchinó nga kamat'ain. ¹⁵ Tsjo kat'ekonuu xi tsjo tjihin. Ch'íiko xi tíkjintá. ¹⁶ B'i ngján nda chasohó xinkiu. Najmi tu nk'a katumanuu yjonuu. Tu sa ní nda chasohó xuta x'an. Najmi tu xuta nkjink'un n'e ma suboo yjonuu.

¹⁷ Najmi tu ch'on n'ohóo xi ch'on títs'innuu. Chase nínú xi nkú ts'ín nda kama n'ohó ngayjee xuta. ¹⁸ Tsa kama, tsa aya ntsoo tíña, kas'ekonuu kjuajyu ngayjee xuta. ¹⁹ Já nts'ena, najmi tu n'e ngajoyo ni xi tín'enuu. Aya ntsja ní Ntjaná t'ejñayo xi b'a tits'íun. At'aha b'i ts'ín tjt'a éhen Ntjaná: “Ahán xi k'uasjé chjía, an xi tsjaha chjíhi. B'a títsu Ntjaná.” ²⁰ B'i ta ts'ín tjt'a ya: “Tsa tíma bjohó nda kontrahi, tjeihin ni xi kjine. Tsa tíma xintáha,

tjeih_{in} ntá xi k'úí. At'ahá tsa b'a n'ei, t_u ni xí kama subahá rā nda kontra_{hi}.” ²¹ Najmi t_u 'bainte_i tsa kjuach'onk'uun xi ts'íin ngan_{hi}. T_u sa ní ni xi nda n'ei. B'a ts'ín n'e ngan_{ha} r_i ni ch'onk'uun.

13

B'i ts'ín tsakúya Pablo nk'ie nga tjihin nga chankjún xi batéxuma

¹ Ngayjee xutá tjihin nga kuint'é'éhen xi batéxuma. At'ahá xá xi tjihin xi batéxuma nginkun Ntíaná nibáha rā. Ntíaná y'éjña xóo. ² Kui nga xi fi kontra_{ha} rā xi batéxuma, kui xi tífi kontra_{ha} ni xi ja y'éjña Ntíaná. Kó xi b'a títs'ín, t_a kuihi t_{ib}angisjai suba nga n'ekokjuaha.

³ At'ahá já xi batéxumoo najmi tjintu tsa t_u xi ndjá ts'ínkoho xutá xi nda ni xi títs'ín. Xutá xi najmi nda ni xi títs'ín, kui xi b'a kats'íhin. ¿A mjehi nga najmi ndjá ts'ínkóhi já xi batéxumoo? Tsa b'a, nda n'ei, kó nda ts'ín kuasehi já xi batéxumoo. ⁴ At'ahá ngandah_i ní títs'ínxát'ahá rā jóo Ntíaná. Tunga tsa ni xi najmi nda t_{in}'ei, tjihin nga kuintjún t_u ngat'ahá ni xi ts'ínkóhi jóo. At'ahá najmi t_u a tjihin xá jóo. Ntía níná títs'ínxát'ahá t_u xi ts'ínk'íechj_ihi kó ts'ínkokjuaha xi ch'on títs'ín. ⁵ Kui nga tjihin nga kuint'ýá'éhen ráá já xi batéxumoo, najmi t_u ngat'ahá ni tsa ts'ínk'íechj_{in}á ni xi n'eé. B'a ní n'eé t_u xi je s'eyaha kjuankjintak'unná nginkun Ntíaná.

⁶ Kui kjuaha nga b'echj_ihinu ni xi f'áchj_{in}u já xi tjihin xá, at'ahá kui xi t_{in}cha ts'ínxát'ahá Ntíaná. Xáha t_{in}cha ts'ín. ⁷ Tjohoon ni xi kanéhe nga nkúnkú jóo. T'echj_ihu xi f'áchj_{in}tjai ni xi tjinnu

kō xi f'áchjǐntjai ch'á nga ts'ínxát'ahá já Romá. Chǎnkjún xi nkú ts'ín tjíhin nga chǎnkjún, kō nda n'esiuhun xi nkú ts'ín tjíhin nga nda n'eshin.

B'i ts'ín tsakúya Pablo mí kjuaha nga n'etjohoná xinkjá

⁸ Najmi tū chumi nihi xi katsjennu. Tjohoon kjuatjo xinkju. At'ahá xi tjohō xinkjín, kui xi tít's'íntjusun ngayjee kjuatéxumaha Ntjaná. ⁹ B'i ts'ín tjít'a kjuatéxumoo: “Najmi tū ch'at'aihi chjǐhin. Najmi tū n'ek'iein animá. Najmi tū n'ei ndyjé. Najmi tū fasihin ni xi tjíhin xuta.” Kui kjuatéxumoo kō ngayjee kjuatéxuma xingisoo nkuhú bichú majihin kjuatéxuma xu'bi: “N'etjói xutahi xi nkú ts'ín tjohi yohi.” ¹⁰ Xi tjohō xinkjín, kui xi najmi ch'on tít's'íhin. Kui nga bichútjusuhun kjuatéxumoo ajihin xuta xi tjíhin ra kjuatjo.

¹¹ B'a n'oo at'ahá yo nǐstjin xi kich'aá nd'ai. Ja chubaha nga n'ekj'áhaá yjoná nga kuintsuba ndaá. Ja 'yún chuba ndyjaha nd'ai nk'ie nga Ntjaná ts'íink'ankiná. Najmi b'a ta tjín ndyjaha ra xi nkúhu nk'ie nga kis'ejinná. ¹² Ja ma kujichúhú chuba. Najmi ta n'ehená ngatitsun, ataha nk'ie nga ngatitsun n'eé, b'a joyaha xi nkúhu tsa má jyuun tintsubaá. Ni xi nda n'eé. Kui xi b'a ta joyaha xi nkúhu tsa má ndzjen tintsubaá. K'úendaá yjoná tū xi kuintmajihinná má ndzjeen.

¹³ Kixi tankínkaá yjoná xi nkúhu xuta xi tjíma nga nǐstjiun. Najmi kuintsubaá tsa tū xi s'ihiná kō chineé. Najmi tjíhin nga chuba súntukonáá xinkjá kō tsa n'ejnu n'et'aá. Kō ta ndaha najmi tū bixkjankaá xinkjá kō tsa kama xin k'aán ni xi tjíhin. ¹⁴ Tū sa ní tǐnúngjiun yjonuu Nda Ntjaná

Jesucristo kō najmi tū n'enkjintak'un xi nkú ts'ín n'ehenu ni xi mjehe yjoninte ngatitsuun.

14

B'i ts'ín tsakúya Pablo nk'ie nga najmi tjihin nga n'ek'anjiá jé xinkíá

¹ Nda n'ekjóhōon xi najmi ndjá síjñajin xi nkú ts'ín s'ejinná, kō najmi tū b'esikōo ngat'aha xi nkú ts'ín ts'innkjink'un. ² Tjín xi b'a ts'ín s'ejihin nga ma kjine tū mí nichinehé ni, kō tjín ngá xi najmi ndjá síjñajin xi nkú ts'ín s'ejinná kui nga tū xkahá kjinehe. ³ Xi kjine tū mí nichinehé ni najmi tjihin nga ch'on ts'ín kuasehe xi b'éch'ohō yjohō ni xi kjine. Kō xi b'éch'ohō yjohō ni xi kjine najmi tjihin nga ts'ínk'anji jé xi kjine tū mí nichinehé ni. B'i incha kats'ín at'aha Ntíaná ja kits'ínkjáihin nga joo. ⁴ ¿Yáha ji xi t'ín'ek'anjihinni jé nda musuhū xi kj'ái? Tsa ndjá síjña nda musu kō tsa tísaténki, Nda Ntíaha kjinehe ni xu'bo. Tunga ndjáhá kuasijña, at'aha tjihin nga'yún Nda Ntíaná nga ndjá ts'ínkasíjñaha.

⁵ Tjín xi b'a maha nga 'yún nkjún sa nku nistjin nga kj'ái nistjin, kō tjín ngá xi tū nku chūba maha nistjiun. Nkúnkú tjihin nga ts'ínkjink'un sisin xi nkú ts'ín behe k'un. ⁶ Xi benkjún nku nistjin, kui xi b'a ts'ín tū xi benkjúhun Nda Ntíaná. Kō xi kjine tū mí nichinehé ni, kui xi b'a ts'ín tū xi benkjúhun Nda Ntíaná. Tsjáha máb'achjíhi Ntíaná ngat'aha nichinehe. Kō xi b'éch'ohō yjohō ni xi kjine, kui xi b'a ts'ín tū xi benkjúhun Nda Ntíaná kō ta tsjáha máb'achjíhi Ntíaná.

⁷ Najmi tjin ajinná xi kuenta ts'e suba tíjña tík'uhun ko tsa kuenta ts'e suba 'mehe. ⁸ Tsa tintsuba tík'aán, Nda Ntjaná tintsuba tík'uhunná. Ko tsa tábayaá, Nda Ntjaná tábayaahaná. Kui b'a maha, ndaha tsa tintsuba tík'aán ko ndaha tsa tábayaá, Nda Ntjaná ts'ená. ⁹ At'aha kui kjuaha k'iehen Cristo ko j'áya ngáha ra ngabayoo, tu xi b'a ts'in kamaha Nda Ntjaha xuta k'ien ko xi tjintu tík'uun.

¹⁰ Ko máha ji, zá ji tichasehe ri tsa nda ko tsa najmi nda tít's'ihin nda nts'ei? Ko ta, zá kinte n'esjeheni nda nts'ei? Katumankjihin nga ndyjun nkin kuasehe Ntjaná mí nihi xi kin'eé nga nkúkáá.

¹¹ B'i ts'in tjit'a éhen Ntjaná:

Ahán xi tíjña tík'an, tít'su Ntjaná.

Kuasinkunch'in ngayjee xuta nginkán,

ko ngayjee ts'íinkie yjoho nga an xi Ntja.

¹² Kui b'a maha, nga nkúkáá n'ekjas'eheén kuenta Ntjaná ni xi kin'eé.

B'i ts'in tsakúya Pablo nk'ie nga najmi tjihin nga n'endyjajihín xinkíá

¹³ Kui nga najmi ta chasehe raá tsa nda ko tsa najmi nda ni xi tít's'ín xinkíá. Tu sa ní chasoo xi nkú ts'in najmi n'endyjajihun nda nts'o ko xi nkú ts'in najmi n'ekijnejiun ngatitsun. ¹⁴ S'ejinna Nda Ntjaná Jesu ko be nga ndaha nku ni najmi chuntí nginkun. Tunga tsa tjin xi: “Chuntí ni xu'bi nginkun”, tsa kuitsu, tu nginkun ndohó chuntí niu.

¹⁵ Tunga tsa tu ngat'aha ni xi tichinei tít's'ínndyjajihín ra yjoho nda nts'ei, najmi ta t'n'etjohoni nda nts'ei ma. Najmi tu 'bainteí

tsa tu ngat'aha nichinehi ndyjaha xuta xi k'ienntjáíhi Cristo. ¹⁶ Najmi tu 'bainto tsa ch'on ts'ín kuinchjayane xuta ni xi n'ekjóhooon nga nda. ¹⁷ At'aha ni xi chineé ko ni xi s'já najmi chumi ni chjíhi ra. Nk'ie ní Espiritu Santo tsjáná nga naxu kuintsubaá nginkun Ntíaná ko nga s'ená kjuajyu ko kjuatsjo, kui ní ni xu'bi xi bakúchji nga ja tsitjas'enjián nga Ntíaná tibatéxumaná. ¹⁸ Xi b'a ts'ín tíña nginkun Cristo, kui nij xi tsjoho Ntíaná ko xuta ta nda ts'ín nchjayanehe.

¹⁹ Kui b'a maha, tinchísjaihiná xi nkú ts'ín s'ehená kjuajyu ko xi nkú ts'ín kuisinkaá xinkíá nga saájián ni xi ts'e Ntíaná. ²⁰ Najmi tu ngat'aha nichinehi n'ekatsúhunni xá xi títs'ín Ntíaná ajihin xuta xi ts'e. Kjuaxi kjáíhin nga je nginkun Ntíaná ngayjee nichine xi tjín, tunga najmi ndahá tjín tsa chineí nichine xi ts'ínkijnejihin ngatitsun xuta xingisoo. ²¹ Tu sahá nda n'ei tsa najmi chineí yjo ko tsa najmi s'i binu ko tsa najmi n'ei ndaha nku ni xi ts'ínkijnejihin ngatitsun já nts'ei.

²² Xi nkú ts'ín s'ejihin ni xu'bi, tu ji b'a ts'ín kas'ejihín ri nginkun Ntíaná. ¡Á b'a nda tjihin ts'e xi behe k'un nga nda tjín ni xi títs'ín ko najmi títs'ínnijéhe ra kjuankjintak'uhun askahan! ²³ Tunga xi jo jan tímaha nga tíkjine tsa mí nihi, ta kuihi títs'ínk'anji jé yjoho, at'aha najmi títs'ín xi nkú ts'ín s'ejihin. At'aha ngayjee ni xi n'eé xi fi kontra xi nkú ts'ín s'ejinná Ntíaná, kui xi ngatitsun.

15

B'i ts'ín tsakúya Pablo nk'ie nga tjihin nga kuisinkaá xinkíá tu xi saájihinná ni xi s'ejinná

1 Nǎ xi ja ndjá tinchajián xi nkú ts'ín s'ejinná najmi tu n'eé ni xi tu ñá tsjo subaháná. Tjihin ni nga n'ekjáíhín xi najmi kjee ndjá tǐnchajin xi nkú ts'ín s'ejinná. 2 Nga nkúnkáá tjihin nga n'eé ni xi tsjohō xinkíá kō ni xi ngandahā n'eé, tu xi saájihin xi nkú ts'ín s'ejinná. 3 At'ahā kō tā Cristo najmi ni xi tsjohō kits'ín. Ni xi tǐt'a ní éhen Ntǐaná má b'a tǐtsu kits'ínkjáíhín: “Én ch'on tsu xi kitsúhi xutā, kui xi j'aisaténa.” 4 Ni xi kis'et'a nǐstjin nk'ie, kis'et'a tu xi kuakú nǐyáhaná. At'ahā ajin xujun éhen Ntǐaná sakújinná kjuatsenta kō sakú nga'yúnná tu xi chúyahā raá ni xi tsjáná Ntǐaná.

5 Ntǐaná xi tsjáná kjuatsenta kō tsjá nga'yúnná, kui xi katsjánuu nga nkuhú n'enkjǐnk'un xi nkú ts'ín tjíyaha Cristo Jesu. 6 Nkuhú kas'eya anǐmanuu kō nkuhú katuma ntanuu. B'a ts'ín n'ekiehenu yjonuu nga tjihin kjuachánka Ntǐahā kō Na'mihǐ Nda Ntǐaná Jesucristo.

B'ǐ ts'ín tsakúya Pablo nk'ie nga xutā xi najmi ntje judío tǐehen ra tsichujǐhín én nda tsuhǐ Cristo

7 Kui b'a maha, b'ǐ ngján nda n'ekjáíhín ruu xinkju xi nkú ts'ín nda kits'ínkjáínnuu Cristo, tu xi s'ejña chjhi kjuachánkahā Ntǐaná. 8 At'ahā an b'a tǐxinnuu. J'ai Cristo ngandahā xutā xi ntje judío tǐehen ra. Tsakúchji nga ts'ín Ntǐaná ni xi kitsú nga ts'ín. J'ai ts'íntjusun ni xi kitsúya tǐtjuhun Ntǐaná ntje cháha xutā judío. 9 B'a ts'ín kō tā xutā xi najmi ntje judío tǐehen ra ts'ínkie yjohō nga tjihin kjuachánka Ntǐaná, at'ahā kō tā kui kichase nǐmahā xi nkú ts'ín tǐt'a éhen Ntǐaná:

Kui nga xínyahana kjuachánkahǐ ajihín xutā xi tǐntu asunntee,

ko séhe nga ts'intsoho.

¹⁰ Ko b'a ta ts'ín tjí't'a ya:

Jun xuta xi tintsu_{boo} asuntee, n'etsjokoo xutaha Ntjaná.

¹¹ Ko b'a ta títsu sa:

N'etsjohoo Ntjaná ngayjee xuta xi tjíntu asuntee.
Chanink'o Ntjaná ngayjee xuta naxinantá xi tjin.

¹² Ko b'a ta ts'ín y'ét'a nda profeta Isaiá:

Stjúkjá nda xi kama kjamaha Isai,
nda xi kjuaitéxumaha xuta xi tjíntu asuntee,
kui kama 'yún tak'un xuta.

¹³ Ntjaná xi tíma 'yún tak'aán, kui xi kats'íntsejinye animanuu kjuatsjo ko kjuajyu, jun xi s'ejinnuu Ntjaná. Katsjá nga'yúnnuu Espiritu Santo tu xi tu nku ndjáhá kuinchajihinnu ni xi tíchuyóhoo.

B'i ts'ín tsakúya Pablo nk'ie nga kui xi nku nda postru xi ts'ínxájihin xuta xi najmi ntje judio tjehe_n ra

¹⁴ Behe k'an, já nts'e, nga kitsejéhinnuu kjuanda ko kjuankjink'un, tu xi kama k'uai niyáha ruu xinkiu. ¹⁵ Tunga tjihín ni xi tíma k'an tib'et'á xujunnuu ei tu xi najmi n'echayahanu. At'aha Ntjaná kitsjana kjuanda xu'bi ¹⁶ nga an xi ts'inxát'aha Cristo Jesu ngandaha xuta xi najmi ntje judio tjehe_n ra. Tib'enijmíhi én nda tsuhu Ntjaná xuta xi najmi ntje judio tjehe_n ra tu xi kuichú maha chje xi tsjohó Ntjaná, chje xi títs'ín tsje Espiritu Santo.

¹⁷ Tsjo mana nga nchjanijmíya xá xi kitsjana Cristo Jesu nga ts'inxát'aha Ntjaná. ¹⁸ At'aha najmi ma k'an nchja ni xi kjaí, tu nkuhú xi

nkú ts'ín ts'ínchjénna Cristo tu xi kuint'é'éhen ra Ntíaná xuta xi najmi ntje judio tjehen ra. Cristo ts'ínchjén ntana ko xana ¹⁹ ko nkjin tikjá kjuankjún xi bakúchji nga'yúhún. Nga'yúhún Espiritu Santo b'a títs'íun. B'a ts'ín jehena nga y'enijmíá én nda tsuhu Cristo nanki Jerusalem ko santaha má nga 'mi Ilirico.

²⁰ Y'enijmíá én nda tsuhu Cristo ante má nga najmi kjee ch'a b'énijmíhi. B'a kits'ian at'aha najmi kama mjena y'esún saha xá xi kik'atuts'ihín xuta xi kj'ai. ²¹ Tu sa ní títs'ian xi nkú ts'ín tjit'a éhen Ntíaná: Xi najmi kjee 'miyaha yáha kui, kui xi skuéhe. Ko xi najmi kjee nt'é yáha kui, kui xi kamankjihín.

B'i ts'ín kitsúya Pablo nk'ie nga mjehé nguaisehé xuta ninku Roma

²² Nkjin niyá najmi kisakú niyána nga kama kfínsehenuu, ²³ tunga nd'ai ja kama ndjuúna xá xi títs'ian ante xi tjín ei ko ta ja tjihín nú nga mjena kfínsenuu. ²⁴ Kui nga mjehena nga skuenú nk'ie nga kfían España, at'aha mjena yo kfian. Tsjo kamana nga kúátejñajinnuu chuba nistjin. Nk'ie nga kj'ua yo, tisinkonú nga ts'inndjaá niyána.

²⁵ Tunga nd'ai nanki Jerusalem tífia. Xuta xi kikj'áts'e Ntíaná kfínsinká yo. ²⁶ At'aha ngayjehe k'un xuta ninku xi tjín ante Macedonia ko ante Akaya incha kits'ínsun toon tu xi ts'ínkjihí ra xuta x'an xi kikj'áts'e Ntíaná xi tjintu Jerusalem. ²⁷ Tsjo kamaha nga b'a incha kits'ín. Ko kjuaxi nga tjehen ts'e xuta xu'bo. At'aha nd'ai títs'ínkjáihín xuta xi najmi ntje judio tjehen ra ni xi ts'e Ntíaná, ni xi Ntíaná kitsjáha xuta xi ntje judio tjehen ra. Kui nga xi najmi ntje judio tjehen ra tjihín nga

kuasinkoho nga kuakjányako xuta xi ntje judio tjehen ra ni xi tjihin ei asunntej. ²⁸ Kui b'a maha, nk'ie nga ja kama ndjuuhuna xa xu'bi ko nk'ie nga ja ts'inkjas'en ni xi kama ñjakúu, as'aíhí ní kfián España ko kj'ua má nga tintsuoo. ²⁹ Be nga Cristo tu xí ndahá ts'iínkoná nk'ie nga kama ñjakáá.

³⁰ Jun já nts'e, ngat'aha Nda Ntíaná Jesucristo ko ngat'aha kjuatjo xi tsjáná Espiritu Santo tibankinu nga chubantjainú nginkun Ntíaná. B'a ts'ín n'ekohonú nga'yún. ³¹ Tinchíhuu nga najmi tu kasatéjña xuta xi najmi s'ejihin Nda Ntíaná xi tjíntu ante Judea. Ko ta tinchíhuu nga xuta xi kikj'áts'e Ntíaná xi tjíntu nanki Jerusalem nda ts'ín ts'iínkjáihín ni xi kfiínkoho. ³² B'a ts'ín tsjo tjihinna nga kuichusenú ko ts'ínkj'áya ichí kutju ajinnuu. B'a katuma tsa b'a ts'ín mjehe Ntíaná. ³³ Ntíaná xi tsjáná kjuajyu kat'ejñajinnuu ngatentoo. B'a katuma.

16

B'i ts'ín kikjaniñaha Pablo xuta ninku xi tjíntu Romá

¹ Be na nichjaá Febe. Ninku xi tjín nanki Cencrea ts'ínxát'a. ² Ngat'aha Nda Ntíaná nda n'ekjóhoón xi nkú ts'ín tjihin nga n'eé ñá xi xutaha Ntíaná mahaná. Tisinkoo nga tjohoon tu mí nihí ni xi machjéhen. At'aha nkjin nkjún xuta tsasinko ko ta tsasinkona.

³ Tjohoon kjuasuniñana Priscila ko Akila, xi ta títs'ínxát'aha Cristo Jesu xi nkúhu an. ⁴ Najmi incha kitsankjún tsa kuayá ngat'ana. Títsjaha máb'achjilhi ngat'aha ni xi incha kits'ín. Najmi tu nku an xi

b'a t́ixian. B'a ta t́incha tsu ngayjee xuta ninku xi najmi ntje judio tjeheñ ra.

⁵ Tjohoon kjuasuniñana xuta ninku xi ma ñjakú ni'yaha Priscila ko Akila. Tjohoon kjuasuniñana Epeneto. 'Yún tjona ndo. Ajihin xuta xi t́in ante Asia, kui xi tjun kis'ejihin Cristo. ⁶ Tjohoon kjuasuniñana Maria. 'Yún tse xá xi kits'ín ajinnuu. ⁷ Tjohoon kjuasuniñana Androniko ko Junias, xi ta ntje judio tjeheñ ra. Ta kis'eya'yúnka nubayá jóo. Ta já postruhú jóo ko yankjún. Kui tjun kis'ejihin Cristo nga an.

⁸ Tjohoon kjuasuniñana Ampliato. 'Yún tjona ndo at'aha ta s'ejihin Nda Ntjaná. ⁹ Tjohoon kjuasuniñana Urbano, kui xi nkúhu jin ta Cristo tít's'inxát'aha. Tjohoon kjuasuniñana Estakis. 'Yún tjona ndo. ¹⁰ Tjohoon kjuasuniñana Apeles, xi ja tsakúchji nga 'yún s'ejihin Cristo. Tjohoon kjuasuniñana xuta xinkjín Aristobulo.

¹¹ Tjohoon kjuasuniñana Herodion, xi ta ntje judio tjeheñ ra. Tjohoon kjuasuniñana xuta xinkjín Narciso, xi ta s'ejihin Nda Ntjaná. ¹² Tjohoon kjuasuniñana Trifena ko Trifosa, xi ta tít's'inxát'aha Nda Ntjaná. Tjohoon kjuasuniñana Persida, xi 'yún tjona ko xi 'yún tse xá xi kits'ín at'aha Nda Ntjaná tjenki.

¹³ Tjohoon kjuasuniñana Rufo, xi Nda Ntjaná j'ájihin, ko naaha, xi ta ko an basehe xi nkúhu tsa naana maha. ¹⁴ Tjohoon kjuasuniñana Asinkrito ko Flegonte ko Hermes ko Patrobas ko Hermas ko já nts'eé xi t́intujihin. ¹⁵ Tjohoon kjuasuniñana Filologo ko Julia ko Nereo ko na nichja ko Olimpás ko ngayjee xutaha Ntjaná xi t́intujihin.

16 B'i ngján súníñohoo xinkiu. Títs'ínkjinuu kjuasuniña ngayjee xuta ninku xi ts'e Cristo.

17 Jun já nts'e, títbankinuu nga chúhūun yjonuu xi bakjanya xuta ko xi ts'ínndyjajihin xuta. Kui xi fi kontraħa ni xi ja tsinchiyó. N'e t'axíhūun yjonuu xuta xu'bo. 18 At'aha xi b'a títs'ín najmi títs'ínxát'aha Nda Ntíaná Jesucristo. Ni xi tsjo níhi tíncha bangisjai. Én sin én nda nchja nga b'anachaha xuta xi najmi kjee 'yún mankjihin ni xi ts'e Ntíaná.

19 Ya tu má xi tjeħén ni nga tínu'yá'ón. Kui nga tsjo mahana ngat'a ts'ajun ko mjena nga 'yún kamankjin sanuu ni xi nda ko nga kuankín t'axíhūun ni xi najmi ndoo. 20 Ntíaná xi tsjáná kjuajyu, kui xi ts'ín nga n'e nganohoo ndanindoo. Kas'enuu kjuandaha Nda Ntíaná Jesucristo.

21 Timoteo títs'ínkjinuu kjuasuniña. Kui xi tjenkona nga t'n'exát'aihi Jesucristo. Ta títs'ínkjinuu kjuasuniña Lucio ko Jason ko Sosipater, xi ta ntje judio tjeħen ra.

22 Ko ta an Tercio xi títs'inntá xi nkú ts'ín títsuyana Pablo, títs'ínkjinuu kjuasuniña, an xi ta s'ejinna Nda Ntíaná.

23 Gayo títs'ínkjinuu kjuasuniña. Ni'yaha tíjña. Yo má nga ma ñjakú ngayjee xuta ninku. Ko ta títs'ínkjinuu kjuasuniña Erasto, xi tjihin xá nga f'átjo toohon xuta nantio, ko ta nda nts'eé Cuarto.

24 Kjuandaha Nda Ntíaná Jesucristo kat'ejñajinnuu ngatento. B'a katuma.

B'i ts'ín kits'ínkje Pablo xujin

²⁵ Kan'etsjohō Nt̄ianá. Kui xi kamaha nga ndjá ts'íínkinchánu xi nkú ts'ín t̄jña én nda tsuhu Jesucristo xi t̄ixinya kō t̄ib'enijmiá. T̄is'ejña chji nd'aj̄ ni xi kis'ejña 'ma nkúhu nú chá ján. ²⁶ Ja t̄is'ejña chji nij xi nkú nga t̄itsu xujuhun já profeta kō t̄ín'ekint'é ngayjee xuta xi t̄jín asuntee. B'a kitsú Nt̄ianá xi t̄jña t̄ík'un sín nga b'a n'e t̄u xi s'ejhin̄ r̄a kō kuint'é'éhen r̄a ngayjee xuta.

²⁷ Ngat'aha Jesucristo kas'ejña chji síhin kjuachánkaha Nt̄ia, kui xi nku tutuu kō xi nkjink'uun. B'a katuma.

Éhen Ntíaná
New Testament in Mazatec, Jalapa de Díaz
(MX:maj:Mazatec, Jalapa de Díaz)

copyright © 2013 Wycliffe Bible Translators, Inc.

Language: Mazatec, Jalapa de Díaz

Translation by: Wycliffe Bible Translators, Inc.

Mazateco, Jalapa de Díaz [maj], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, Jalapa de Díaz

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

e05183c2-7c34-5cdd-8c78-15ea51bd8cbb